



JAMHURI YA MUUNGANO WA TANZANIA

WIZARA YA FEDHA

**MWONGOZO WA MAANDALIZI YA MPANGO NA BAJETI YA
SERIKALI KWA MWAKA 2025/26**

NOVEMBA 2024

YALIYOMO

YALIYOMO.....	1
VIFUPISHO.....	I
MUHTASARI.....	II
1. MUHTASARI WA MWENENDO NA MWELEKEO WA HALI YA UCHUMI NA UTEKELEZAJI WA MPANGO NA BAJETI KWA MWAKA 2023/24.....	1
1.1 Utangulizi.....	1
1.2 Mwenendo na Mwelekeo wa Uchumi	1
1.3 Deni la Serikali.....	4
1.4 Mapitio ya Utekelezaji wa Mpango na Bajeti kwa Mwaka 2023/24	4
1.5 Mwenendo wa Utekelezaji wa Bajeti kwa Kipindi cha Robo ya Kwanza ya Mwaka 2024/25 ...	5
2. VIPAUMBELE VYA MPANGO NA BAJETI KWA MWAKA 2025/26.....	6
2.1 Vipaumbele Mahsusi kwa Mwaka 2025/26	6
2.2 Shabaha na Misingi ya Uchumi Jumla	7
2.3 Makadirio ya Bajeti ya Serikali kwa Mwaka 2025/26	8
3. USIMAMIZI WA VIHATARISHI VYA UTEKELEZAJI WA MPANGO NA BAJETI	18
3.1. Utangulizi.....	18
3.2. Vihatarishi vya Mpango na Bajeti	18
3.2.1. Vihatarishi vya Uchumi Jumla	18
3.2.2. Madeni Sanjari.....	19
3.2.3. Mabadiliko ya Tabianchi na Majanga ya Asili.....	19
3.2.4. Migogoro ya Kisiasa na Mahusiano ya Kidiplomasia.....	19
3.2.5. Udukuzi na Shambulio la Mifumo ya Kielektroniki.....	19
3.3. Hatua za Kukabiliana na Vihatarishi	20
4. MAELEKEZO YA MAANDALIZI YA MPANGO NA BAJETI KWA MWAKA 2025/26	22
4.1 Maandalizi ya Mpango na Bajeti.....	22
4.2 Maelekezo ya Uandaaji wa Mpango na Bajeti.....	25
4.3 Maelekezo Mahsusi kwa Wakala za Serikali, Taasisi na Mashirika ya Umma	30
4.4 Maelekezo kwa Ofisi za Wakuu wa Mikoa na Mamlaka za Serikali za Mitaa	31
4.5 Masuala Mengine Muhimu ya Kuzingatiwa Wakati wa Uandaaji wa Mpango na Bajeti	35
4.6 Ufuatiliaji, Tathmini na Utoaji Taarifa za Utekelezaji wa Mpango na Bajeti	39
4.7 Maelekezo kuhusu Maandalizi ya Uchaguzi Mkuu	40

VIFUPISHO

AFDP	Agriculture and Fisheries Development Programme
ASDP	Agriculture Sector Development Programme
BBT	Building Better Tomorrow
CBR	Central Bank Rate
CCM	Chama Cha Mapinduzi
CSR	Corporate Social Responsibility
DCF	Development Co-operation Framework
EAC	East African Community
EFD	Electronic Fiscal Device
EPZ	Export Processing Zone
GIS	Geographical Information System
GFS	Government Finance Statistics
GoT HOMIS	Government of Tanzania Health Operation Management Information System
HCMIS	Human Capital Management Information System
IMF	International Monetary Fund
MTEF	Medium Term Expenditure Framework
MCC	Millennium Challenge Corporation
MTAKUWWA	Mpangokazi wa Pili wa Taifa wa Kutokomeza Ukatili dhidi ya Wanawake na Watoto
NeST	National e-Procurement System of Tanzania
NMNAP	National Multi-Sectoral Nutrition Action Plan
NMSF	National Multi-Sectoral Strategic Framework
OR - MUUUB	Ofisi ya Rais, Menejimenti ya Utumishi na Utawala Bora
OR - TAMISEMI	Ofisi ya Rais, Tawala za Mikoa na Serikali za Mitaa
PFMRP	Public Finance Management Reform Programme
PPP	Public Private Partnership
REGROW	Resilience Natural Resources for Tourism Growth
SMT	Serikali ya Jamhuri ya Muungano wa Tanzania
SMZ	Serikali ya Mapinduzi ya Zanzibar
SADC	Southern African Development Community
SEZ	Special Economic Zone
TDV	Tanzania Development Vision
TARURA	Tanzania Rural and Urban Roads Agency
TEHAMA	Teknolojia ya Habari na Mawasiliano
UKIMWI	Upungufu wa Kinga Mwilini
VAT	Value Added Tax
VVU	Virusi Vya Ukimwi
WEO	World Economic Outlook

MUHTASARI

Mwongozo wa Mpango na Bajeti umeandaliwa kwa mujibu wa Kifungu Na. 21 cha Sheria ya Bajeti, Sura 439. Mwongozo wa Mwaka 2025/26 ni wa mwisho katika utekelezaji wa Dira ya Taifa ya Maendeleo 2025 (TDV 2025) pamoja na Mpango wa Maendeleo wa Taifa wa Miaka Mitano 2021/22 – 2025/26. Maandalizi ya Mpango na Bajeti yamezingatia: Ilani ya CCM kwa ajili ya Uchaguzi ya Mwaka 2020, Mpango wa Tatu wa Maendeleo wa Taifa wa Miaka Mitano 2021/22 – 2025/26, Makubaliano ya Paris kuhusu Mabadiliko ya Tabianchi, Agenda 2063 ya Maendeleo ya Afrika, Malengo ya Maendeleo Endelevu 2030 na maelekezo mahsusi ya Serikali. Lengo la Mwongozo wa Mpango na Bajeti ni kutoa maelekezo kwa Maafisa Masuuli wote kuhusu mambo ya kuzingatia wakati wa maandalizi ya Bajeti ya mwaka 2025/26 .

Maeneo yaliyopewa kipaumbele ni pamoja na maelekezo kuhusu ulazima wa kuzingatia vipaumbele vya mpango; maelekezo ya ujumla kuhusu uandaaji wa Mpango na Bajeti; Maelekezo mahususi kwa Mamlaka ya Serikali za Mitaa, Mashirika na Taasisi za Umma. Maeneo mengine ni, usimamizi wa vihatarishi vya utekelezaji wa mpango ikijumuisha uainishaji, mikakati na hatua stahiki; ufuatiliaji na tathmini; uharibifu wa mazingira na mabadiliko ya tabianchi; na masuala ya Muungano. Mwongozo umegawanyika katika sehemu kuu nne ambazo ni: Muhtasari wa mwenendo na mwelekeo wa hali ya uchumi; vipaumbele vya mpango na bajeti ya Serikali kwa mwaka 2025/26; na maelekezo ya maandalizi ya mpango na bajeti kwa mwaka 2025/26. Mwongozo huu unapaswa kusomwa pamoja na viambatisho vyake vyote.

Utekelezaji wa maelekezo ya Mwongozo huu kwa ukamilifu utachangia: udhibiti wa matumizi ya fedha za umma na kuleta tija iliyokusudiwa; kuongezeka kwa ushiriki wa sekta binafsi kwenye shughuli za uwekezaji na biashara; kutoa fursa sawa za ajira kwa wote; kuendelea kuhimili athari za majanga ya asili na yasiyo ya asili; kuendelea kuimarika kwa utoshelevu wa chakula nchini; kuendelea kuongeza upatikanaji wa huduma za jamii kwa wote na uwepo wa amani, usalama, umoja na utulivu wa ndani na nchi jirani. Hivyo, Maafisa Masuuli wote wanasisitizwa kuzingatia maelekezo ya mwongozo huu kwa ukamilifu.

1. MUHTASARI WA MWENENDO NA MWELEKEO WA HALI YA UCHUMI NA UTEKELEZAJI WA MPANGO NA BAJETI KWA MWAKA 2023/24

1.1 Utangulizi

1. Sura hii inaelezea mwenendo wa hali ya uchumi wa dunia, kikanda na Tanzania kwa mwaka 2023 na mwelekeo wa uchumi katika kipindi cha mwaka 2024 hadi mwaka 2025, deni la Serikali pamoja na mapitio ya ukusanyaji wa mapato na matumizi ya Serikali kwa mwaka 2023/24 na utekelezaji wa bajeti kwa robo ya kwanza ya mwaka 2024/25.

1.2 Mwenendo na Mwelekeo wa Uchumi

1.2.1 Ukuaji wa Uchumi wa Dunia na Kikanda

1. Uchumi wa dunia umeendelea kukua licha ya kukabiliana na changamoto zilizotokana na utekelezaji wa sera ya fedha ya kupunguza ukwasi katika kukabiliana na ongezeko la mfumuko wa bei, migogoro ya kisiasa hususan Ulaya Mashariki na Mashariki ya Kati, kuongezeka kwa bei za bidhaa za petroli, gharama kubwa za mikopo na mabadiliko ya tabianchi. Kwa mujibu wa taarifa ya Shirika la Fedha la Kimataifa - IMF *World Economic Outlook* – WEO, toleo la Julai 2024, uchumi wa dunia ulikua kwa wastani wa asilimia 3.3 mwaka 2023 ikilinganishwa na asilimia 3.5 mwaka 2022 na unatarajiwa kukua kwa asilimia 3.2 mwaka 2024 na asilimia 3.3 katika mwaka unaofuatia.

2. Katika nchi zilizoendelea, taaifa ya WEO inaonesha uchumi ulikua kwa wastani wa asilimia 1.7 mwaka 2023 ikilinganishwa na asilimia 2.6 mwaka 2022 na unatarajiwa kukua kwa asilimia 1.7 na asilimia 1.8 mwaka 2024 na 2025, mtawaliwa. Uchumi wa nchi zinazoibukia kiuchumi na zinazoendelea ulikua kwa wastani wa asilimia 4.4 mwaka 2023 ikilinganishwa na asilimia 4.1 mwaka 2022. Uchumi wa nchi hizo unatarajiwa kukua wastani wa asilimia 4.3 mwaka 2024 na 2025. Uchumi wa nchi zilizo Kusini mwa Jangwa la Sahara ulikua kwa wastani wa asilimia 3.4 mwaka 2023 ikilinganishwa na asilimia 4.0 mwaka 2022 na unatarajiwa kukua kwa asilimia 3.7 mwaka 2024 na asilimia 4.1 mwaka 2025. Uchumi wa nchi za Jumuiya ya Maendeleo Kusini mwa Afrika - SADC ulikua kwa wastani wa asilimia 3.9 mwaka 2023 ikilinganishwa na asilimia 5.0 mwaka 2022. Uchumi wa nchi hizo unatarajiwa kukua kwa wastani wa asilimia 3.7 na asilimia 3.9 mwaka 2024 na 2025, mtawaliwa. Kwa nchi za ukanda wa Jumuiya ya Afrika Mashariki - EAC, uchumi ulikua kwa wastani wa asilimia 4.6 mwaka 2023 ikilinganishwa na asilimia 4.2 mwaka 2022 na unatarajiwa kukua kwa wastani wa asilimia 5.4 mwaka 2024 na asilimia 6.1 mwaka 2025.

1.2.2 Ukuaji wa uchumi wa Tanzania

3. Shughuli za kiuchumi zimeendelea kuimarika licha ya kukabiliana na changamoto zilizotokana na utekelezaji wa sera ya fedha ya kupunguza ukwasi katika nchi zilizoendelea, migogoro ya kikanda, kuongezeka kwa bei za bidhaa za petroli, gharama kubwa za mikopo na mabadiliko ya tabianchi. Pato halisi la Taifa

lilifikia shilingi bilioni 148,399.76 mwaka 2023 kutoka shilingi bilioni 141,247.19 mwaka 2022, sawa na ukuaji wa asilimia 5.1 ikilinganishwa asilimia 4.7 mwaka 2022. Ukuaji huo ulichangiwa kwa kiasi kikubwa na shughuli za kilimo, ujenzi na uchimbaji madini. Viashiria vya kiuchumi kwa nusu ya kwanza ya mwaka 2024 vinaonesha uchumi kuendelea kuimarika kutokana na jitihada zinazoendelea za kuboresha mazingira ya uwekezaji na kuongezeka kwa mikopo kwa sekta binafsi. Aidha, Pato halisi la Taifa kwa kipindi cha Januari hadi Juni 2024, lilikua kwa wastani wa asilimia 5.4 ikilinganishwa na asilimia 4.8 katika kipindi kama hicho mwaka 2023. Hivyo, Pato halisi la Taifa linatarajiwa kukua kwa asilimia 5.4 mwaka 2024 na kuongezeka hadi asilimia 5.8 mwaka 2025 na asilimia 6.1 mwaka 2026. Ukuaji huu utategemea utekelezaji endelevu wa miradi mikubwa ya kimkakati inayohusisha miundombinu ya nishati na usafirishaji, jitihada za Serikali kuboresha mazingira ya uwekezaji, utekelezaji wa Programu ya Kuendeleza Sekta ya Kilimo Awamu ya Pili – ASDP II, pamoja na uwekezaji wa Serikali katika sekta za kijamii.

1.2.3 Mfumuko wa Bei Tanzania

4. Mfumuko wa bei ulikuwa asilimia 3.2 mwaka 2023/24, kiwango ambacho kipo ndani ya lengo la nchi la asilimia 5.0 na sawia na malengo ya mtangamano wa kiuchumi kikanda (EAC na SADC). Aidha, kiwango hicho kilikuwa chini ya asilimia 4.7 kwa mwaka 2022/23. Kupungua huko kulitokana na utekelezaji wa sera madhubuti za fedha na bajeti, kupungua kwa bei za baadhi ya bidhaa muhimu zinazoagizwa kutoka nje ya nchi, na utoshelevu wa chakula nchini. Mfumuko wa bei nchini unatarajiwa kubaki ndani ya lengo la nchi la asilimia 5, ukichangiwa na matarajio ya upatikanaji wa chakula cha kutosha nchini, kuimarika kwa upatikanaji wa umeme hususan kukamilika kwa ujenzi wa mradi wa kufua umeme wa Julius Nyerere, utulivu wa bei za bidhaa katika soko la dunia pamoja na utekelezaji wa sera madhubuti za fedha na bajeti.

1.2.4 Utekelezaji wa Sera ya Fedha

5. Matokeo ya utekelezaji wa sera ya fedha yalikuwa ya kuridhisha, licha ya kukabiliwa na changamoto mbalimbali, hususan zilizotokana na mwenendo usioridhisha wa uchumi wa dunia na uhaba wa fedha za kigeni. Januari 2024, Benki Kuu ilianza kutekeleza sera ya fedha kwa kutumia mfumo wa Riba ya Benki Kuu (Central Bank Rate - CBR), lengo likiwa ni kuongeza ufanisi wa sera ya fedha ili kuendana na mabadiliko ya mazingira ya kiuchumi. Utekelezaji wa sera ya fedha kwa kutumia mfumo huu utachangia katika kuongeza ukuaji wa shughuli za kiuchumi kutokana na ongezeko la mikopo kwa sekta binafsi, na kuimarisha mazingira ya biashara na uwekezaji nchini. Ukuaji wa mikopo kwa sekta binafsi uliendelea kuwa imara, licha ya kasi ya ukuaji kupungua. Mikopo kwa sekta binafsi ilikua kwa wastani wa asilimia 18.1 katika mwaka 2023/24 ikilinganishwa na asilimia 22.2 mwaka 2022/23. Ongezeko la mikopo kwa sekta binafsi lilichangiwa zaidi na mikopo iliyoelekezwa kwenye kilimo, uchimbaji madini, uchukuzi na mawasiliano, shughuli binafsi na uzalishaji viwandani.

1.2.5 Viwango vya Riba

6. Riba za dhamana za Serikali ziliongezeka hadi wastani wa asilimia 9.14 mwaka 2023/24 kutoka asilimia 5.73 mwaka 2022/23. Hali hii ilitokana na kupungua kwa ukwasi (tight financial conditions) katika masoko ya fedha, kama ilivyokuwa katika nchi nyingine kufuatia benki kuu duniani kutekeleza sera ya fedha kukabiliana na ongezeko la mfumuko wa bei. Riba za mikopo zilipungua hadi wastani wa asilimia 15.47 mwaka 2023/24 kutoka asilimia 16.04 mwaka 2022/23. Riba za amana ziliongezeka hadi asilimia 7.32 kutoka asilimia 7.16 mwaka 2022/23. Riba za mikopo kwa sekta binafsi zinatarajiwa kupungua kutokana na hatua zinazochukuliwa na Serikali katika kuboresha sekta ya fedha pamoja na matarajio ya kuwa na mfumuko wa bei mdogo nchini.

1.2.6 Viwango vya Ubadilishaji Fedha

7. Thamani ya shilingi ya Tanzania dhidi ya dola ya Marekani ilipungua kwa wastani wa asilimia 8.5 kwa mwaka 2023/24, ikilinganishwa na takriban asilimia moja kwa mwaka 2022/23. Kupungua huko kulitokana na uhaba wa fedha za kigeni nchini uliotokana na uamuzi wa benki kuu za nchi zilizoendelea kupandisha riba ili kukabiliana na mfumuko wa bei pamoja na kupanda kwa bei za bidhaa katika soko la dunia, hususan bidhaa za petroli kulikosababisha ongezeko kubwa la mahitaji ya fedha za kigeni. Thamani ya shilingi inatarajiwa kuimarika kutokana na hatua mbalimbali zinazochukuliwa na Serikali ikiwemo utekelezaji wa Mkakati wa Taifa wa Kuimarisha Upatikanaji wa Fedha za Kigeni pamoja na katazo la matumizi ya fedha za kigeni katika kufanya malipo nchini.

1.2.7 Sekta ya Fedha

8. Katika kutekeleza Mpango Mkakati wa Huduma Jumuishi za Kifedha (2023 – 2028), Serikali imeimarisha mifumo ya malipo ya kielektroniki na matumizi ya simu za mkononi katika huduma za kifedha. Aidha, ili kuimarisha huduma jumuishi za fedha, Serikali imeendelea kushirikiana na wadau wa sekta ya fedha kwa kutoa elimu na kufanya tafiti kuhusu hali ya huduma za kifedha nchini.

9. Benki za biashara zimeendelea kuimarika na kutengeneza faida zikiwa na viwango vya kutosha vya mitaji na ukwasi, ambapo kwa mwaka 2023/24 faida ya benki za biashara ilikuwa shilingi bilioni 1,060.87. Aidha, mikopo chechefu ilipungua hadi asilimia 4.1 kutoka asilimia 5.3 mwaka 2022/23. Mtaji wa Jumla wa Soko la Hisa katika kipindi kilichoishia Juni 2024 uliongezeka kwa asilimia 12.1 na kufikia shilingi bilioni 16,834.28 ikilinganishwa na shilingi bilioni 15,010.36 katika kipindi kilichoishia Juni 2023. Aidha, mauzo ya hisa katika Soko la Hisa la Dar es Salaam yaliongezeka kwa asilimia 153.4 na kufikia shilingi bilioni 272.69 ikilinganishwa na shilingi bilioni 107.61 katika kipindi kilichoishia Juni 2023. Vilevile, mali za soko la bima (assets) ziliongezeka kwa asilimia 25.9 kufikia shilingi bilioni 2,144 mwaka 2023 ikilinganishwa na shilingi bilioni 1,679 mwaka 2022 ambapo wanufaika wa huduma za bima waliongezeka kwa asilimia 32.0. Ongezeko hilo linatokana na Serikali kuendelea kutoa elimu ya masuala ya bima kwa jamii.

1.2.8 Sekta ya Nje

10. Sekta ya nje iliendelea kuimarika ikilinganishwa na mwaka 2022/23, kutokana na kuongezeka kwa mauzo nje ya nchi yatokanayo na utalii, dhahabu na bidhaa asilia pamoja na kupungua kwa uagizaji wa bidhaa kutoka nje ya nchi. Kwa mwaka 2023/24, akiba ya fedha za kigeni ilikuwa dola za Marekani milioni 5,345.5, kiasi kinachotosheleza uagizaji wa bidhaa na huduma nje ya nchi kwa takribani miezi 4.4. Kiasi hiki ni zaidi ya shabaha ya nchi ya miezi minne (4) ya uagizaji wa bidhaa na huduma nje ya nchi. Sekta ya nje inatarajiwa kuendelea kuimarika kutokana na kupungua kwa athari za mitikisiko ya kiuchumi duniani, ambapo nakisi ya urari wa malipo ya kawaida (current account deficit) inakadiriwa kupungua hadi kufikia asilimia 3.2 ya Pato la Taifa kwa mwaka ulioishia Septemba 2024 kutoka asilimia 4.4 ya Pato la Taifa katika kipindi kama hicho mwaka 2023. Mwenendo huu ulitokana na ongezeko la mauzo ya bidhaa na huduma nje ya nchi, hususan utalii, dhahabu, tumbaku, korosho, na bidhaa za mbogamboga na maua.

1.3 Deni la Serikali

11. Hadi Juni 2024, deni la Serikali lilikuwa shilingi bilioni 96,884.18 ikilinganishwa na shilingi bilioni 81,980.26 Juni 2023. Kati ya deni hilo, deni la nje lilikuwa shilingi bilioni 64,932.94 na deni la ndani lilikuwa shilingi bilioni 31,951.24. Tathmini ya uhimilivu wa deni iliyofanyika Juni 2024 imeonesha kuwa deni ni himilivu na viashiria vya deni la Serikali viko ndani ya wigo unaokubalika kimataifa katika kipindi cha muda wa kati na mrefu. Aidha, mwaka 2023/24, kampuni za Fitch Ratings na Moody's Investors Service zilifanya mapitio ya tathmini ya nchi kukopesheka katika masoko ya mitaji ya kimataifa na kuchapisha matokeo ya daraja B1 na B+ mtawalia. Matokeo mazuri ya tathmini hizo yalitokana na ukuaji mzuri wa uchumi unaoweza kuhimili mitikisiko ya kiuchumi, utekelezaji wa mageuzi ya kimuundo yanayoboresha mazingira ya biashara, ufanisi wa ukusanyaji wa mapato na usimamizi wa fedha za umma.

1.4 Mapitio ya Utekelezaji wa Mpango na Bajeti kwa Mwaka 2023/24

12. Katika mwaka 2023/24, Serikali ilikadiriwa kukusanya na kutumia shilingi bilioni 44,338.07. Katika kipindi hicho, Serikali ilikusanya jumla ya shilingi bilioni 42,920.62 sawa na asilimia 96.7 ya bajeti iliyoidhinishwa. Kiasi hiki kinajumuisha shilingi bilioni 29,829.89 mapato ya ndani sawa na asilimia 95.1 ya lengo la mwaka la shilingi bilioni 31,381.01; shilingi bilioni 5,581.61 ni misaada na mikopo nafuu kutoka kwa Washirika wa Maendeleo sawa na asilimia 102.1 ya lengo la shilingi bilioni 5,466.21; na shilingi bilioni 7,509.11 ni mikopo ya kibiashara ya ndani na nje ya nchi sawa na asilimia 99.6 ya lengo la mwaka la shilingi bilioni 7,540.84.

13. Katika kipindi hicho, Serikali imetumia shilingi bilioni 42,945.21 kugharamia utekelezaji wa shughuli na miradi mbalimbali ya Serikali ikiwemo miradi ya kimkakati na kielelezo. Kati ya kiasi hicho, shilingi bilioni 28,308.79 ni matumizi ya kawaida na shilingi bilioni 14,636.42 ni matumizi ya maendeleo. Aidha, kiasi cha shilingi bilioni

24.59 kiligharamiwa kwa mkopo wa muda mfupi kutoka Benki Kuu ambao upo ndani wigo unaokubalika kisheria. Maelezo ya kina yanapatikana katika **Kiambatisho Na. 1C.**

1.5 Mwenendo wa Utekelezaji wa Bajeti kwa Kipindi cha Robo ya Kwanza ya Mwaka 2024/25

14. Katika kipindi cha robo ya kwanza ya mwaka 2024/25, Serikali imekusanya shilingi bilioni 11,553.33 kutoka vyanzo vyote vya ndani na nje. Kati ya kiasi hicho, shilingi bilioni 7,930.02 ni mapato ya ndani, sawa na asilimia 99.4 ya lengo la shilingi bilioni 7,976.35. Misaada na mikopo nafuu ilifikia shilingi bilioni 1,373.09, sawa na asilimia 118.5 ya lengo la shilingi bilioni 1,159.18. Aidha, mikopo ya kibiashara kutoka masoko ya ndani ilifikia shilingi bilioni 1,656.56, sawa na asilimia 97.8 ya lengo la shilingi bilioni 1,694.35. Mikopo ya kibiashara kutoka nje ilifikia shilingi bilioni 593.65, sawa na asilimia 79.5 ya lengo la shilingi bilioni 746.78.

15. Katika kipindi cha robo ya kwanza ya utekelezaji wa bajeti ya mwaka 2024/25, ridhaa ya shilingi bilioni 11,667.53 ilitolewa kwa ajili ya matumizi ya kawaida na maendeleo. Kati ya kiasi hicho, matumizi ya kawaida ni shilingi bilioni 7,549.62 na matumizi ya maendeleo ni shilingi bilioni 4,117.91. Aidha, kiasi cha shilingi bilioni 114.20 kiligharamiwa kwa mkopo wa muda mfupi kutoka Benki Kuu ambao upo ndani wigo unaokubalika kisheria.

2. VIPAUMBELE VYA MPANGO NA BAJETI KWA MWAKA 2025/26

16. Mwaka 2025/26, Serikali itaendelea kutekeleza vipaumbele vilivyoainishwa katika Mpango wa Maendeleo wa Taifa wa Miaka Mitano 2021/22 – 2025/26 ambavyo ni kuchochea uchumi shindani na shirikishi, kuimarisha uwezo wa uzalishaji viwandani na utoaji huduma, kukuza uwekezaji na biashara, kuchochea maendeleo ya watu na kuendeleza ujuzi.

2.1 Vipaumbele Mahsusi kwa Mwaka 2025/26

Kwa kuzingatia vipaumbele vya Mpango wa Maendeleo, maeneo mahsusi yatakayopewa kipaumbele cha bajeti kwa mwaka 2025/26 ni:

- (i) **Uendelezaji wa Miundombinu:** Uendelezaji wa miundombinu ya usafirishaji, maji, nishati na TEHAMA ili kuwezesha mageuzi ya viwanda na kuchochea biashara na kuimarisha ushiriki wa nchi katika utangamano wa kikanda. Baadhi ya miradi itakayoendelea kupewa kipaumbele ni: ujenzi wa Reli ya Kisasa ya SGR, ujenzi na ukarabati wa miundombinu ya usafirishaji wa umeme na uimarishaji wa gridi ya Taifa, usambazaji wa Mkongo wa Taifa wa Mawasiliano pamoja na ujenzi wa madaraja na barabara.
- (ii) **Mapinduzi ya Sekta ya Kilimo:** Eneo hili litajielekeza katika uboreshaji wa kilimo ikiwemo matumizi ya teknolojia na mbinu za kisasa, tafiti na uongezaji thamani wa mazao ya kilimo, mifugo na uvuvi. Lengo ni kuongeza tija, kuimarisha usalama na utoshelevu wa chakula nchini, kuimarisha upatikanaji wa masoko na kuongeza kipato cha wakulima, wafugaji na wavuvi. Baadhi ya programu zitakazopewa kipaumbele ni: Programu ya Kuendeleza Sekta ya Kilimo Awamu ya Pili - ASDP II, Programu ya Mifumo Himilivu ya Chakula, Programu ya Jenga Kesho Iliyo Bora – BBT na Programu ya Kuendeleza Kilimo na Uvuvi – AFDP.
- (iii) **Uzalishaji Viwandani:** Msukumo utawekwa katika kuongeza thamani ya uzalishaji viwandani kwa kuchochea upatikanaji na matumizi ya teknolojia za kisasa ikiwa ni pamoja na ujenzi wa miundombinu ya mitaa ya viwanda (industrial clusters), upatikanaji wa fedha na mitaji, kuimarisha masoko ya bidhaa za viwandani na kuendeleza miundombinu ya Maeneo Maalum ya Kiuchumi (SEZ na EPZ).
- (iv) **Uendelezaji wa Sekta ya Madini:** Eneo hili litajielekeza katika uboreshaji wa sekta ya madini kwa: Kufanya tafiti na ugani wa jiosayansi ikiwemo utafiti wa kina wa jiofizikia kwa njia ya kurusha ndege (high resolution airborne geophysical survey) kwa ajili ya kukusanya taarifa za hali ya madini nchini; uendelezaji wa miradi ya madini muhimu na madini mkakati; kuhamasisha shughuli za uongezaji thamani madini; kuhamasisha ushiriki wa sekta binafsi wakiwemo wachimbaji wadogo kwenye uchumi wa madini; na kuimarisha mifumo ya usimamizi, ukaguzi na biashara ya madini ili kuongeza mapato

kwa kudhibiti utoroshaji wa madini na ukwepaji kodi.

- (v) **Uendelezaji wa Sekta ya Utalii:** Kukuza utalii endelevu ili kupanua shughuli za kiuchumi na kuongeza mapato ya fedha za kigeni kupitia uendelezaji wa miundombinu ya utalii, kuibua mazao mapya ya utalii, kutangaza vivutio vya kipekee vya Tanzania na uhifadhi wa mazingira ikiwemo utekelezaji wa miradi mbalimbali ya kuendeleza utalii.
- (vi) **Kukuza Sekta ya Fedha:** Kuimarisha upatikanaji wa huduma za fedha kwa kuwezesha uendelezaji wa bidhaa na huduma mbalimbali za fedha ikiwemo upatikanaji wa mikopo kwa gharama nafuu, ukuzaji wa masoko ya mitaji na uendelezaji wa huduma za bima.
- (vii) **Kuongeza wigo wa Kinga ya Jamii:** Kutoa kinga ya jamii kwa makundi yaliyo katika hali hatarishi kutokana na umaskini, uzee, ulemavu na majanga na kuongeza idadi ya wanufaika hususan kutoka katika sekta isiyo rasmi ili kuhakikisha ustawi wa jamii yote na kutoa kipaumbele katika utekelezaji wa mpango wa bima ya afya kwa wote.
- (viii) **Usimamizi wa Mazingira na Mabadiliko ya Tabianchi:** Kutekeleza sera za hifadhi na usimamizi wa mazingira kwa lengo la kuimarisha hifadhi ya bionuwai, kukabiliana na athari za mabadiliko ya tabianchi na kuimarisha udhibiti wa uchafuzi wa mazingira ili kuwezesha ukuaji endelevu wa uchumi na kupunguza uharibifu wa Mazingira. Hii inajumuisha utekelezaji wa Mpango Kabambe wa Hifadhi na Usimamizi wa Mazingira (2022 - 2032) pamoja na Mkakati wa Taifa wa Matumizi ya Nishati Safi ya Kupikia (2024 – 2034).
- (ix) **Utawala na Maboresho ya Kitaasisi:** Kuboresha usimamizi na mifumo ya kitaasisi ili kuimarisha utawala bora kwa kupambana na vitendo vya rushwa, kuongeza uwazi na uwajibikaji pamoja na kujenga taasisi imara zinazosimamia utawala wa sheria.
- (x) **Kukuza usawa wa kijinsia na uwezesaji wa makundi maalum:** Msukumo utawekwa katika kutoa fursa sawa kwa makundi maalum ili kunufaika na fursa za kiuchumi na kijamii.

2.2 Shabaha na Misingi ya Uchumi Jumla

2.2.1 Shabaha za Uchumi Jumla

17. Shabaha na malengo ya uchumi jumla yatakayozingatiwa kwa mwaka 2025/26 ni:

- (i) Pato halisi la Taifa linakadiriwa kukua kwa asilimia 5.8 mwaka 2025 na kuongezeka hadi asilimia 6.1 mwaka 2026;
- (ii) Mfumuko wa bei unatarajiwa kubaki kwenye wigo wa tarakimu moja wa wastani wa asilimia kati ya 3.0 - 5.0 katika muda wa kati;

- (iii) Mapato ya ndani kufikia asilimia 16.1 na mapato ya kodi asilimia 13.0 ya Pato la Taifa kwa mwaka 2025/26; na
- (iv) Kuwa na akiba ya fedha za kigeni kwa kiwango kinachokidhi mahitaji ya uagizaji wa bidhaa na huduma kutoka nje kwa kipindi kisichopungua miezi minne (4).

2.2.2 Misingi ya Uchumi Jumla

18. Misingi iliyotumika katika kuandaa malengo ya uchumi jumla ni pamoja na:
- (i) Kuimarika kwa uchumi wa dunia na utulivu wa bei katika masoko ya fedha na bidhaa;
 - (ii) Kuongezeka kwa ushiriki wa sekta binafsi katika uwekezaji na biashara;
 - (iii) Kuendelea kuhimili athari za mabadiliko ya tabia nchi na majanga ya asili na yasiyo ya asili (ukame, vita, magonjwa ya mlipuko na mafuriko)
 - (iv) Kuimarika kwa upatikanaji na usalama wa chakula nchini; na
 - (v) Kuendelea kuwepo kwa amani, usalama na utulivu wa ndani ya nchi na katika nchi jirani.


2.3 Makadirio ya Bajeti ya Serikali kwa Mwaka 2025/26

Mwaka 2025/26, Serikali inatarajia kukusanya na kutumia shilingi bilioni 55,061.61 ili kugharamia utekelezaji wa mpango na bajeti.

2.3.1 Mapato ya Ndani

19. Mwaka 2025/26, mapato ya ndani ikijumuisha mapato ya Mamlaka za Serikali za Mitaa yanakadiriwa kuwa shilingi bilioni 38,962.49. Kati ya mapato hayo, mapato ya kodi ni shilingi bilioni 31,426.12, mapato yasiyo ya kodi ni shilingi bilioni 5,976.57 na mapato yanayokusanywa na Mamlaka ya Serikali za Mitaa ni shilingi bilioni 1,559.79. Katika kipindi cha muda wa kati, mapato ya ndani yanakadiriwa kukua kwa wastani wa asilimia 11.2 na kufikia shilingi bilioni 47,551.76 mwaka 2027/28. Mchango wa mapato ya ndani katika bajeti unakadiriwa kuwa asilimia 70.8 mwaka 2025/26 na kuendelea kuongezeka hadi asilimia 76.2 mwaka 2027/28. Mchanganuo wa mapato ya ndani kwa muda wa kati ni kama inavyoonekana katika **Kielelezo Na. 2.1.**

Kielelezo Na 2.1: Mchanganuo wa Mapato ya Ndani katika Muda wa Kati (Shilingi Bilioni)



2.3.1.1 Mikakati na Hatua za Ukusanyaji wa Mapato ya Ndani

Mikakati

- (i) Kufanya tafiti, tathimini, na mapitio ya vyanzo vya mapato vilivyopo na kuboresha kanzidata ya walipakodi, ada na tozo za Serikali ili kubaini maeneo yenye upotevu na kuongeza ufanisi wa ukusanyaji wa mapato;
- (ii) Kuanzisha vituo vya huduma za kodi kwenye maeneo yanayokua katika shughuli za kiuchumi ikiwemo biashara ndogondogo;
- (iii) Kuunganisha mifumo ya kodi na mifumo ya taasisi nyingine za umma ili kupata taarifa zitakazowaibua walipakodi ambao hawajasajiliwa ili kuwaingiza kwenye mfumo rasmi wa kodi;
- (iv) Kutanua wigo wa ukusanyaji wa mapato kwa kuibua vyanzo vipya vya mapato pamoja na kuweka mbinu za kurahisisha utambuzi, usajili, ukadiriaji na ulipaji wa kodi, ada na tozo za Serikali;
- (v) Kuboresha usimamizi na ufuatiliaji wa walipakodi kwa kutumia Mfumo wa Vitalu vya Walipakodi unaotumia teknolojia ya Mfumo wa Taarifa wa Kijiografia – Geographical Information System (GIS);
- (vi) Kuendelea kuhamasisha na kutoa elimu kuhusu matumizi ya mashine za kutolea risiti za kielektroniki - EFD kupitia uendeshaji wa programu mbalimbali za hamasa ikiwemo Tunu ya Uzalendo;
- (vii) Kuhakikisha taasisi zenye mlengo wa utoaji huduma kwa pamoja zinaboresha mifumo ya ukusanyaji kwa kutoa namba ya malipo jumuishi ili kurahisisha ulipaji wa kodi, ada na tozo kwa wateja na hivyo kuongeza uhiari wa ulipaji wa mapato ya Serikali;
- (viii) Kuendelea kuwekeza kwenye matumizi ya teknolojia na kuboresha ushirikiano wa pamoja kwa taasisi za Serikali zinazokusanya mapato kwa

lengo la kubadilishana taarifa na mbinu za ukusanyaji ili kupunguza gharama na kuongeza ufanisi;

- (ix) Kukabiliwa na vitendo vya ukwepaji kodi kwa kuimarisha upatikanaji wa taarifa na kuendelea kujenga uwezo wa watumishi wa umma, hususan kwenye maeneo ya ukaguzi na uchunguzi;
- (x) Kuimarisha usimamizi na ukusanyaji wa ada na tozo mbalimbali kwenye shughuli za kiuchumi zinazokua ikiwemo sekta ya ardhi, uvuvi, misitu, mifugo na ujenzi na hivyo kuwa na fursa kubwa ya mapato;
- (xi) Kuboresha utozaji wa vyanzo vya mapato vinavyototwa na mamlaka za udhibiti kwa kushughulikia dosari na malalamiko yanayotolewa na wananchi;
- (xii) Kuhamasisha na kuhimiza matumizi ya malipo ya kidigitali ili kupunguza matumizi ya fedha taslimu; na
- (xiii) Kufanya mapitio ya vivutio vya kodi/misamaha ya kodi iliyotolewa ili kubaini faida na umuhimu wa kuendelea nayo au vinginevyo.

Hatua

- (i) Kuboresha mazingira ya biashara na uwekezaji nchini katika sekta za huduma na uzalishaji ili kuongeza ushiriki wa sekta binafsi;
- (ii) Kuongeza wigo kwa kutambua vyanzo vipya vya mapato pamoja na kuongeza idadi ya walipakodi;
- (iii) Kuimarisha na kuhimiza matumizi ya mifumo ya TEHAMA ya ukusanyaji wa mapato ya ndani;
- (iv) Kuandaa mpango na mkakati wa kuimarisha usimamizi wa ukusanyaji wa mapato yasiyo ya kodi katika Wizara, Idara, Wakala za Serikali na Mamlaka za Serikali za Mitaa;
- (v) Kuendelea kuboresha huduma zinazotolewa kwa wananchi ili wawe na motisha ya ulipaji wa kodi, tozo na ada kwa Serikali kwa hiari;
- (vi) Kudhibiti utoaji wa misamaha ya kodi; na
- (vii) Kuendelea kuboresha utendaji wa mashirika ya umma ili kuongeza mchango wake katika mapato.

2.3.2 Misaada

20. Katika mwaka 2025/26, misaada kutoka kwa Washirika wa Maendeleo inakadiriwa kuwa shilingi bilioni 1,024.88, sawa na ongezeko la asilimia 29.0 ikilinganishwa na shilingi bilioni 794.39 zilizoahidiwa mwaka 2024/25. Ongezeko hilo linatokana na kuongezeka kwa ahadi za fedha za misaada kwenye programu ya *Millenium Challenge Corporation* (MCC), Mfuko wa Sekta ya Afya na Mfuko wa Usimamizi wa Fedha za Umma - PFMRP. Katika kipindi cha muda wa kati, fedha za misaada zinatarajiwa kuongezeka kwa wastani wa asilimia 6.9.

2.3.2.1 Mikakati ya Upatikanaji wa Misaada

21. Serikali itaendelea kutekeleza Mwongozo wa Ushirikiano wa Maendeleo kwa lengo la kuimarisha ushirikiano na Washirika wa Maendeleo kupitia Majadiliano ya Kimkakati (Strategic Dialogue) yanayolenga kuainisha vipaumbele vya Serikali ili

kuwezesha upatikanaji wa fedha za misaada kama ilivyopangwa. Vilevile, Serikali itaendelea kutekeleza mambo yafuatayo:

- (i) Kuhamasisha Washirika wa Maendeleo kutoa fedha za misaada moja kwa moja Serikalini bila kupitia Mashirika Yasiyo ya Kiserikali ili kuongeza tija ya fedha hizo katika utekelezaji wa miradi mbalimbali; na
- (ii) Kuendelea kutenga sehemu ya bajeti ya Serikali (counterpart fund) kwa miradi ya maendeleo inayotekelezwa kwa ushirikiano na Washirika wa Maendeleo.

2.3.3 Matumizi

22. Matumizi ya Serikali yanakadiriwa kuwa shilingi bilioni 55,061.61 kwa mwaka 2025/26, sawa na ongezeko la asilimia 11.6 kutoka shilingi bilioni 49,345.69 mwaka 2024/25. Kati ya kiasi hicho, matumizi ya kawaida ni shilingi bilioni 38,602.18 na matumizi ya maendeleo shilingi bilioni 16,459.43. Matumizi ya kawaida yanajumuisha gharama kwa ajili ya: deni la Serikali shilingi bilioni 14,208.98; mishahara shilingi bilioni 13,454.24; huduma za mfuko mkuu na uendeshaji wa shughuli za Serikali shilingi bilioni 9,496.92; na ruzuku ya maendeleo shilingi bilioni 1,442.04 kwa ajili ya Programu ya Elimumsingi na Sekondari Bila Ada na mikopo ya wanafunzi wa elimu ya juu. Aidha, matumizi ya maendeleo yanajumuisha shilingi bilioni 11,508.53 fedha za ndani na shilingi bilioni 4,950.90 fedha za nje. Vilevile, kFatika kipindi cha muda wa kati, matumizi ya Serikali yanatarajiwa kukua kwa wastani wa asilimia 8.2. Mchanganuo wa makadirio ya matumizi ya Serikali umeanishwa katika **Jedwali Na. 2.1 hadi 2.5**.

2.3.3.1 Mikakati ya Usimamizi wa Matumizi

23. Mikakati ya usimamizi wa matumizi katika kipindi cha muda wa kati itajumuisha yafuatayo:

- (i) Kuendelea kusimamia na kuimarisha matumizi sahihi ya mifumo ya TEHAMA katika utekelezaji wa shughuli za Serikali ili kudhibiti matumizi ikijumuisha mifumo ya usimamizi wa rasilimali watu, malipo serikalini, ununuzi na usimamizi wa mali za Serikali;
- (ii) Kuelekeza fedha katika kutekeleza miradi ya kimkakati yenye tija kubwa katika uchumi na ustawi wa jamii na kuhakikisha miradi inayoendelea inapewa kipaumbele kabla ya miradi mipya;
- (iii) Kuimarisha uwajibikaji na udhibiti katika matumizi ya fedha za umma kwa kuzingatia sheria, kanuni na taratibu za matumizi ya fedha za umma ili kuziba mianya ya ubadhilifu kwa lengo la kupata thamani ya fedha katika matumizi ya Serikali;
- (iv) Kuimarisha mfumo wa usimamizi na utendaji kazi katika taasisi na mashirika ya umma;
- (v) Kuunganisha mifumo ili kuiwezesha kubadilishana taarifa za kibajeti;
- (vi) Kuendelea kukuza na kuimarisha ushirikiano wa kisekta ili kuepuka rasilimali kutumika kutekeleza jukumu linalofanana katika wizara/taasisi zaidi ya moja; na

(vii) Kuimarisha ufuatiliaji na tathmini katika utekelezaji wa miradi ili kuhakikisha inatekelezwa kwa ufanisi na kuokoa gharama za ziada zinazoweza kujitokeza wakati wa utekelezaji.

2.3.4 Kugharamia Nakisi ya Bajeti

24. Serikali itaendelea kugharamia nakisi ya bajeti kwa kutumia mikopo kutoka vyanzo vya ndani na nje kwa kuzingatia Mkakati wa Muda wa Kati wa Kusimamia Deni la Serikali wa mwaka 2024. Katika mwaka 2025/26, Serikali inatarajia kukopa shilingi bilioni 15,074.24. Kati ya kiasi hicho, mikopo ya ndani yenye masharti ya kibiashara ni shilingi bilioni 6,278.19, mikopo ya nje yenye masharti nafuu shilingi bilioni 5,667.04 na mikopo ya nje yenye masharti ya kibiashara shilingi bilioni 3,129.01. Fedha zitakazokopwa zitaelekezwa kwenye kugharamia miradi inayochochea kasi ya ukuaji wa uchumi pamoja na hatifungani za Serikali zilizoiva.

Jedwali Na 2.1: Makadirio ya Bajeti katika Kipindi cha Muda wa Kati 2024/25 - 2027/28 (Analytical Budget Frame)

Shilingi Bilioni

	2024/25 BAJETI ILIYOIDHINISHWA	2025/26 MAKADIRIO YA BAJETI	2026/27 MAKADIRIO YA BAJETI	2027/28 MAKADIRIO YA BAJETI
Jumla ya Mapato ya Ndani	34,610.65	38,962.49	42,775.56	47,551.76
Mapato ya Kodi	28,046.65	31,426.12	34,539.94	38,422.27
Mapato Yasiyo ya Kodi	5,207.66	5,976.57	6,503.69	7,241.69
Mapato ya Halmashauri	1,356.34	1,559.79	1,731.93	1,887.80
Jumla ya Matumizi*	41,806.20	47,346.35	51,181.46	53,408.23
Matumizi ya Kawaida	27,035.89	30,886.92	33,084.15	35,525.53
Malipo ya Riba Nje	2,435.31	2,796.43	2,887.75	2,947.26
Malipo ya Riba Ndani	3,146.67	3,697.29	3,965.08	3,965.08
Mishahara	11,767.99	13,454.24	14,304.24	15,154.24
Michango ya Serikali kwenye Mifuko ya Jamii	2,000.00	2,428.49	2,608.99	2,807.54
Matumizi mengineyo	6,414.24	7,068.43	7,699.86	8,862.23
Ruzuku ya Maendeleo	1,271.69	1,442.04	1,618.23	1,789.18
-Bodi ya Mikopo ya Wanafunzi wa Elimu ya Juu	787.42	931.07	1,051.56	1,160.75
-Elimumsingi na Sekondari Bila Ada	484.27	510.97	566.66	628.43
Matumizi ya Maendeleo	14,770.30	16,459.43	18,097.31	17,882.70
Fedha za Ndani	11,129.47	11,508.53	11,997.03	12,924.11
Fedha za Nje	3,640.84	4,950.90	6,100.28	4,958.59
Nakisi ya Bajeti bila ya Kujumlisha Misaada	(7,195.55)	(8,383.86)	(8,405.90)	(5,856.47)
Misaada	794.39	1,024.88	1,087.30	930.58
Misaada ya Kibajeti	109.02	113.80	105.83	100.52
Misaada ya Maendeleo	572.96	801.98	882.17	753.98
Mifuko ya Kisekta	112.41	109.11	99.29	76.08
Nakisi ya Bajeti Ikijumlisha Misaada	(6,401.16)	(7,358.97)	(7,318.61)	(4,925.89)
Jumla ya Nakisi	(6,401.16)	(7,358.97)	(7,318.61)	(4,925.89)
Kuziba Nakisi	6,401.16	7,358.97	7,318.61	4,925.89
Kuziba Nakisi Kutoka Nje	3,805.74	4,406.34	4,354.18	1,961.47
Mikopo Nafuu ya Kibajeti	1,380.75	1,627.22	699.71	-
Mikopo Nafuu ya Miradi ya Maendeleo	2,888.99	3,959.19	5,038.19	4,087.64
Mikopo Nafuu ya Mifuko ya Kisekta	66.48	80.62	80.62	40.89
Mikopo ya Kibiashara	2,986.64	3,129.01	3,011.95	2,524.20
Malipo ya Mtaji Deni la Nje	(3,517.12)	(4,389.71)	(4,476.29)	(4,691.27)
Kuziba Nakisi Kutoka Ndani	2,595.42	2,952.63	2,964.42	2,964.42
Mkopo kwa ajili kugharamia miradi ya maendeleo (NDF)	2,595.42	2,952.63	2,964.42	2,964.42
Mkopo kwa ajili ya kulipa mtaji	4,022.37	3,325.56	4,192.89	4,318.68
Malipo ya Mtaji Deni la Ndani (Rollover)	(4,022.37)	(3,325.56)	(4,192.89)	(4,318.68)
Pato Ghafi la Taifa	218,779.14	242,071.49	267,419.82	297,420.82

Chanzo: Wizara ya Fedha

*Tanbihi: Kiasi cha jumla ya matumizi hakijumuishi malipo ya mtaji

Jedwali Na 2.2: Makadirio ya Bajeti kwa Asilimia ya Pato la Taifa kwa Kipindi cha Muda wa Kati 2024/25 -2027/28 (Analytical Budget Frame)

	2024/25 BAJETI ILIYOIDHINISHWA	2025/26 MAKADIRIO YA BAJETI	2026/27 MAKADIRIO YA BAJETI	2027/28 MAKADIRIO YA BAJETI
Jumla ya Mapato ya Ndani	15.8%	16.1%	16.0%	16.0%
Mapato ya Kodi	12.8%	13.0%	12.9%	12.9%
Mapato Yasiyo ya Kodi	2.4%	2.5%	2.4%	2.4%
Mapato ya Halmashauri	0.6%	0.6%	0.6%	0.6%
Jumla ya Matumizi*	19.1%	19.6%	19.1%	18.0%
Matumizi ya Kawaida	12.4%	12.8%	12.4%	11.9%
Malipo ya Riba Nje	1.1%	1.2%	1.1%	1.0%
Malipo ya Riba Ndani	1.4%	1.5%	1.5%	1.3%
Mishahara	5.4%	5.6%	5.3%	5.1%
Michango ya Serikali kwenye Mifuko ya Jamii	0.9%	1.0%	1.0%	0.9%
Matumizi mengineyo	2.9%	2.9%	2.9%	3.0%
Ruzuku ya Maendeleo				
-Bodi ya Mikopo ya Wanafunzi wa Elimu ya Juu	0.4%	0.4%	0.4%	0.4%
-Elimumsingi na Sekondari Bila Ada	0.2%	0.2%	0.2%	0.2%
Matumizi ya Maendeleo	6.8%	6.8%	6.8%	6.0%
Fedha za Ndani	5.1%	4.8%	4.5%	4.3%
Fedha za Nje	1.7%	2.0%	2.3%	1.7%
Nakisi ya Bajeti bila ya Kujumlisha Misaada	-3.3%	-3.5%	-3.1%	-2.0%
Misaada	0.4%	0.4%	0.4%	0.3%
Misaada ya Kibajeti	0.0%	0.0%	0.0%	0.0%
Misaada ya Maendeleo	0.3%	0.3%	0.3%	0.3%
Mifuko ya Kisekta	0.1%	0.0%	0.0%	0.0%
Nakisi ya Bajeti Ikijumlisha Misaada	-2.9%	-3.0%	-2.7%	-1.7%
Jumla ya Nakisi	-2.9%	-3.0%	-2.7%	-1.7%
Kuziba Nakisi	2.9%	3.0%	2.7%	1.7%
Kuziba Nakisi Kutoka Nje	1.7%	1.8%	1.6%	0.7%
Mikopo Nafuu ya Kibajeti	0.6%	0.7%	0.3%	0.0%
Mikopo Nafuu ya Miradi ya Maendeleo	1.3%	1.6%	1.9%	1.4%
Mikopo Nafuu ya Mifuko ya Kisekta	0.0%	0.0%	0.0%	0.0%
Mikopo ya Kibiashara	1.4%	1.3%	1.1%	0.8%
Malipo ya Mtaji Deni la Nje	-1.6%	-1.8%	-1.7%	-1.6%
Kuziba Nakisi Kutoka Ndani	1.2%	1.2%	1.1%	1.0%
Mkopo kwa ajili kugharamia miradi ya maendeleo (NDF)	1.2%	1.2%	1.1%	1.0%
Mkopo kwa ajili ya kulipa mtaji	1.8%	1.4%	1.6%	1.5%
Malipo ya Mtaji Deni la Ndani (Rollover)	-1.8%	-1.4%	-1.6%	-1.5%

Chanzo: Wizara ya Fedha

Jedwali Na 2.3: Makadirio ya Bajeti katika Kipindi cha Muda wa Kati 2024/25 - 2027/28 (Accounting Budget Frame)

Shilingi Bilioni

	2024/25 BAJETI ILIOYODHINISHWA	2025/26 MAKADIRIO YA BAJETI	2026/27 MAKADIRIO YA BAJETI	2027/28 MAKADIRIO YA BAJETI
I. JUMLA YA MAPATO	49,345.69	55,061.61	59,850.64	62,418.18
Mapato ya Ndani ikijumuisha mapato ya Halmashauri	34,610.65	38,962.49	42,775.56	47,551.76
Misaada na Mikopo Nafuu ya Kibajeti	1,489.77	1,741.02	805.54	100.52
Misaada na Mikopo Nafuu ya Miradi	3,461.95	4,761.17	5,920.37	4,841.62
Misaada na Mikopo Nafuu ya Mifuko ya Kisekta	178.89	189.74	179.92	116.97
Mikopo ya Ndani - Kulipa Mtaji Deni la Ndani (Rollover)	4,022.37	3,325.56	4,192.89	4,318.68
Mikopo ya Ndani ya Kibiashara (NDF)	2,595.42	2,952.63	2,964.42	2,964.42
Mikopo ya Nje ya Kibiashara	2,986.64	3,129.01	3,011.95	2,524.20
II. JUMLA YA MATUMIZI	49,345.69	55,061.61	59,850.64	62,418.18
Matumizi ya Kawaida	34,575.38	38,602.18	41,753.33	44,535.47
Mfuko Mkuu wa Serikali	15,736.28	17,340.28	18,921.81	19,608.64
o/w Malipo ya riba	5,581.97	6,493.72	6,852.83	6,912.34
o/w Malipo ya mtaji	7,539.49	7,715.26	8,669.18	9,009.95
Mishahara	11,767.99	13,454.24	14,304.24	15,154.24
Matumizi Mengineyo	5,799.42	6,365.62	6,909.05	7,983.41
Ruzuku ya Maendeleo	1,271.69	1,442.04	1,618.23	1,789.18
Matumizi ya Maendeleo	14,770.30	16,459.43	18,097.31	17,882.70
Fedha za Ndani	11,129.47	11,508.53	11,997.03	12,924.11
Fedha za Nje	3,640.84	4,950.90	6,100.28	4,958.59
Pato Ghafi la Taifa	218,779.14	242,071.49	267,419.82	297,420.82

Chanzo: Wizara ya Fedha

Tanbihi: Kiasi cha jumla ya matumizi kinajumuisha malipo ya mtaji

Jedwali Na 2.4: Makadirio ya Bajeti kwa Asilimia ya Pato la Taifa kwa Kipindi cha Muda wa Kati 2024/25 -2027/28 (Accounting Budget Frame)

	2024/25 BAJETI ILIYOIDHINISHWA	2025/26 MAKADIRIO YA BAJETI	2026/27 MAKADIRIO YA BAJETI	2027/28 MAKADIRIO YA BAJETI
I. JUMLA YA MAPATO	22.6%	22.7%	22.4%	21.0%
Mapato ya Ndani ikijumuisha mapato ya Halmashauri	15.8%	16.1%	16.0%	16.0%
Misaada na Mikopo Nafuu ya Kibajeti	0.7%	0.7%	0.3%	0.0%
Misaada na Mikopo Nafuu ya Miradi	1.6%	2.0%	2.2%	1.6%
Misaada na Mikopo Nafuu ya Mifuko ya Kisekta	0.1%	0.1%	0.1%	0.0%
Mikopo ya Ndani - Kulipa Mtaji Deni la Ndani (Rollover)	1.8%	1.4%	1.6%	1.5%
Mikopo ya Ndani ya Kibiashara (NDF)	1.2%	1.2%	1.1%	1.0%
Mikopo ya Nje ya Kibiashara	1.4%	1.3%	1.1%	0.8%
II. JUMLA YA MATUMIZI	22.6%	22.7%	22.4%	21.0%
Matumizi ya Kawaida	15.8%	15.9%	15.6%	15.0%
Mfuko Mkuu wa Serikali	7.2%	7.2%	7.1%	6.6%
o/w Malipo ya riba	2.6%	2.7%	2.6%	2.3%
o/w Malipo ya mtaji	3.4%	3.2%	3.2%	3.0%
Mishahara	5.4%	5.6%	5.3%	5.1%
Matumizi Mengineyo	2.7%	2.6%	2.6%	2.7%
Ruzuku ya Maendeleo	0.6%	0.6%	0.6%	0.6%
Matumizi ya Maendeleo	6.8%	6.8%	6.8%	6.0%
Fedha za Ndani	5.1%	4.8%	4.5%	4.3%
Fedha za Nje	1.7%	2.0%	2.3%	1.7%

Chanzo: Wizara ya Fedha

**Jedwali Na 2.5: Mgawanyo wa Bajeti Kisekta kwa Kipindi cha Muda wa Kati
2024/25 -2027/28**

(Shilingi Bilioni)

SEKTA	2024/25 BAJETI ILIYOIDHINISHWA	2025/26 MAKADIRIO YA BAJETI	2026/27 MAKADIRIO YA BAJETI	2027/28 MAKADIRIO YA BAJETI
1 - Elimu	6,168.39	6,985.82	7,551.68	7,880.24
1.1 - Elimu Msingi	4,395.26	4,977.72	5,380.93	5,615.04
1.2 - Elimu ya Ufundi na Mafunzo ya Ufundi Stadi	196.54	222.58	240.61	251.08
1.3 - Elimu ya Juu	1,347.03	1,525.54	1,649.11	1,720.85
1.4 - Sayansi, Teknolojia na Ubunifu	72.37	81.96	88.60	92.46
1.5 - Huduma za Utawala	157.19	178.02	192.44	200.81
2 - Afya	2,540.89	2,877.60	3,110.69	3,246.03
2.1 - Huduma za Tiba	1,062.38	1,203.16	1,300.62	1,357.21
2.2 - Huduma za Kinga	310.73	351.91	380.42	396.97
2.4 - Zahanati	61.02	69.10	74.70	77.95
2.5 - Vituo vya Afya	109.28	123.76	133.78	139.61
2.6 - Hospitali za Wilaya	901.82	1,021.33	1,104.06	1,152.09
2.7 - Huduma za Utawala	95.66	108.34	117.11	122.21
3 - Huduma za Utawala na Deni la Serikali	13,237.71	14,917.61	15,959.07	16,653.41
3.1 - Utawala na Bunge	5,068.05	5,493.29	5,938.25	6,196.61
3.2 - Usimamizi wa mapato na Matumizi	2,346.94	2,657.95	2,873.25	2,998.26
3.3 - Mambo ya Nje na Ushirikano wa Kimataifa	240.75	272.66	294.74	307.56
3.4 - Deni la Serikali (Malipo ya Riba)	5,581.97	6,493.72	6,852.83	7,150.98
4 - Ulinzi, Utawala wa Sheria na Usalama	5,493.17	6,221.13	6,725.05	7,017.64
4.1 - Ulinzi	3,323.46	3,763.89	4,068.77	4,245.79
4.2 - Usalama wa Umma	1,703.82	1,929.61	2,085.91	2,176.66
4.3 - Mahakama	465.89	527.63	570.37	595.19
5 - Maendeleo ya Uchumi	10,291.02	11,729.14	12,846.09	13,405.00
5.1 - Kilimo	1,938.94	2,195.89	2,373.76	2,477.04
5.2 - Madini	231.91	262.64	283.92	296.27
5.3 - Nishati	1,883.74	2,207.73	2,449.85	2,556.43
5.4 - Ujenzi, Uchukuzi na Mawasiliano	5,483.92	6,210.65	6,817.31	7,113.91
5.5 - Maliasili, Utalii na Mazingira	335.35	379.79	410.56	428.42
5.6 - Viwanda	111.15	125.88	136.07	141.99
5.7 - Biashara	272.01	308.06	333.01	347.50
5.8 - Kazi, Maendeleo ya Vijana na Kukuza Ujuzi	33.99	38.50	41.62	43.44
6 - Hifadhi ya Jamii	2,653.44	3,005.07	3,248.49	3,389.82
6.1 - Wazee, Watoto na Watu wenye Ulemavu	50.11	56.75	61.35	64.02
6.2 - Mifuko ya Hifadhi ya Jamii	2,157.07	2,442.93	2,640.81	2,755.70
6.3 - Mfuko wa Bima wa Afya	446.25	505.39	546.33	570.10
7 - Maji, Makazi na Maendeleo ya Jamii	1,421.58	1,609.97	1,740.38	1,816.10
7.1 - Maji	641.88	726.94	785.83	820.02
7.2 - Ardhi, Nyumba na Makazi ya Watu	174.09	197.16	213.13	222.41
7.3 - Maendeleo ya Jamii	320.32	362.76	392.15	409.21
7.4 - Habari, Michezo na Utamaduni	285.29	323.10	349.27	364.46
Jumla ya Sekta	41,806.19	47,346.34	51,181.46	53,408.24
Deni la Serilaki (Malipo ya Mtaji)	7,539.49	7,715.26	8,669.18	9,009.95
Jumla Kuu	49,345.69	55,061.61	59,850.64	62,418.18

Chanzo: Wizara ya Fedha

3. USIMAMIZI WA VIHATARISHI VYA UTEKELEZAJI WA MPANGO NA BAJETI

3.1. Utangulizi

25. Katika uandaaji wa mpango na bajeti, Serikali huainisha vipaumbele katika utekelezaji wa mikakati mbalimbali ili kufikia malengo ya kitaifa. Hata hivyo, baadhi ya vihatarishi vinaweza kujitokeza na kuathiri utekelezaji wa mikakati husika katika hatua mbalimbali za usimamizi wa mpango na bajeti. Kwa muktadha huo, ni muhimu kuainisha vihatarishi husika pamoja na mikakati ya kukabiliana navyo ili kuhakikisha malengo ya mpango na bajeti yanafikiwa kama ilivyokusudiwa.

3.2. Vihatarishi vya Mpango na Bajeti

26. Malengo ya mpango na bajeti yanaweza kuathiriwa zaidi na vihatarishi vifuatavyo;

3.2.1. Vihatarishi vya Uchumi Jumla

27. Vihatarishi vya uchumi jumla vinaweza kujitokeza kutokana na hali halisi ya mazingira ya ndani na nje ya nchi. Vihatarishi vinavyoweza kuathiri viashiria vya uchumi jumla vinatokana na matukio hatarishi ya asili na yasiyo ya asili. Pamoja na vihatarishi vingine, viashiria vya uchumi jumla huathiriwa zaidi na vihatarishi vinavyohusiana na bei za mazao, bidhaa na huduma, viwango vya riba katika soko, viwango vya kubadilisha fedha na mikopo ya sekta binafsi na sekta ya umma. Matukio, sababu na athari za vihatarishi vya uchumi jumla ni kama ifuatavyo:

(i) Mabadiliko ya Bei za Bidhaa Muhimu

28. Kupanda kwa bei za bidhaa muhimu, hususan bei za bidhaa za petroli katika soko la dunia kunaweza kuathiri matumizi ya Serikali na uwezo wa wananchi kununua bidhaa na huduma. Aidha, kuyumba kwa bei za bidhaa katika soko la dunia kama vile bidhaa za madini na mazao ya biashara kutokana na mabadiliko hasi ya uchumi wa dunia na kuvurugika kwa mnyororo wa usambazaji wa bidhaa na huduma kunaweza kupunguza mapato yatoanayo na mauzo ya bidhaa nje ya nchi na kusababisha kutofikiwa kwa malengo ya mpango na bajeti pamoja na kuathiri thamani ya shilingi.

(ii) Kuongezeka kwa Riba za Mikopo

29. Kuongezeka kwa riba za mikopo katika masoko ya fedha ya ndani na nje ya nchi kutaathiri uwezo wa Serikali wa kukopa na kuhudumia deni lililoiva. Kuongezeka kwa gharama za mikopo katika masoko ya fedha kunaathiri mahitaji mengine ya kibajeti, hususan uagizaji wa bidhaa za mtaji na mali ghafi kwa ajili ya uwekezaji wa umma na binafsi.

(iii) Kushuka kwa thamani ya Shilingi

30. Thamani ya shilingi ya Tanzania dhidi la dola ya Marekani inaweza kushuka kutokana na uhaba wa fedha za kigeni nchini unaosababishwa na ongezeko kubwa la mahitaji ya fedha za kigeni kwa ajili ya kugharamia bidhaa muhimu zinazotoka nje

hususan bidhaa za petroli. Kushuka kwa thamani ya shilingi kutaongeza gharama za kuhudumia deni la Serikali la nje ambalo malipo yake hufanyika kwa kutumia fedha za kigeni. Athari nyingine zinazoweza kujitokeza ni kuongezeka kwa gharama za uagizaji wa bidhaa, hususan bidhaa za mitaji na malighafi kutoka nje ya nchi na hivyo kuchochea mfumuko wa bei nchini. Matokeo ya athari hizo ni ukuaji mdogo wa uchumi kutokana na gharama kubwa za uendeshaji wa biashara, uwekezaji na kupungua kwa uwezo wa wananchi kununua bidhaa na huduma na hivyo kuathiri utekelezaji wa mpango na bajeti ya Serikali.

3.2.2. Madeni Sanjari

31. Dhamana ya kukopa iliyotolewa na Serikali kwa taasisi na mashirika ya umma zinaweza kusababisha madeni, endapo taasisi na mashirika husika yatashindwa kurejesha mikopo kwa mujibu wa mikataba na hivyo kulazimu Serikali kurejesha mikopo hiyo ambayo haikuwa sehemu ya mpango na bajeti. Aidha, Serikali hulazimika kugharamia malipo ya fidia na madai yatokanayo na amri za mahakama kutokana na ukiukaji wa masharti ya mikataba. Mahitaji hayo yakijitokeza yanaweza kusababisha ongezeko la madai na deni la Serikali, kuathiri uwezo wa nchi kukopesheka, na kupunguza uwezo wa serikali kugharamia mahitaji ya kibajeti, hususan miradi ya maendeleo na uendeshaji wa shughuli za kawaida.

3.2.3. Mabadiliko ya Tabianchi na Majanga ya Asili

32. Matukio ya asili kama ukame, mafuriko, mmomonyoko wa udongo, vimbunga na matetemeko ya ardhi yanasababisha uharibifu wa miundombinu, mali na vifo, kupungua kwa mapato ya taasisi, serikali na watu binafsi pamoja na uwekezaji wa sekta ya umma na binafsi. Kutokana na athari za matukio ya asili, gharama za urejeshwaji wa miundombinu, mali na misaada kwa waathirika ambayo haikuwa sehemu ya mpango na bajeti ya taasisi, serikali na watu binafsi huathiri utekelezaji wa bajeti ya serikali kwa ujumla. Aidha, kwa kuzingatia kuwa kilimo kinachangia sehemu kubwa ya Pato la Taifa, mabadiliko ya tabianchi yanaweza kusababisha mfumuko wa bei za chakula na kudhoofisha shughuli zinazochochea ukuaji wa uchumi na utekelezaji wa bajeti ya serikali.

3.2.4. Migogoro ya Kisiasa na Mahusiano ya Kidiplomasia

33. Migogoro ya kisiasa ya ndani na nje ya nchi inaweza kuvuruga au kudumaza shughuli za kiuchumi na kijamii, na hivyo kuathiri mpango kazi wa upatikanaji wa mapato ya serikali, uwekezaji kutoka nje na mnyororo wa uhitaji na ugavi wa mazao, bidhaa na huduma ndani pamoja na mahitaji ya ziada ya ulinzi.

3.2.5. Udukuzi na Shambulio la Mifumo ya Kielektroniki

34. Mifumo ya kielektroniki ya usimamizi wa mapato, matumizi na uendeshaji wa shughuli za serikali inaweza kudukuliwa na kushambuliwa kutokana na vishawishi vya wizi na mazingira ya ushindani, hivyo kuathiri utekelezaji wa mpango na bajeti ya serikali. Aidha, matumizi mabaya au udanganyifu katika matumizi ya mifumo ya kielektroniki unaweza kuchepusha mapato na matumizi ya serikali na kudhoofisha

huduma kwa jamii, hususan malipo kwa watumishi, wazabuni, huduma za kijamii na usalama wa mali na watu.

3.3. Hatua za Kukabiliana na Vihatarishi

35. Ili kukabiliana na athari za vihatarishi katika utekelezaji wa mpango na bajeti, Serikali itaendelea kutekeleza mikakati iliyoainishwa kwenye **Jedwali Na. 3.1**:

Jedwali Na. 3.1: Hatua za Kukabiliana na Vihatarishi

Na	Kihatarishi	Hatua ya kukabiliana na kihatarishi
1.	Vihatarishi vya uchumi jumla (i) Mabadiliko ya bei za bidhaa muhimu (ii) Kuongezeka kwa riba za mikopo (iii) Kushuka kwa thamani ya shilingi	Kuendelea kutekeleza na kusimamia sera ya fedha na bajeti kwa lengo la kuhakikisha malengo na shabaha za kiuchumi yanafikiwa. Kuendelea kutekeleza Mkakati wa Taifa wa Kuimarisha Upatikanaji wa fedha za Kigeni. Kuendelea kuhimiza matumizi ya nishati mbadala kama vile nishati ya gesi ili kupunguza athari za kupanda kwa bei ya bidhaa za petroli katika soko la dunia. Kuendelea kutenga rasilimali kwa ajili ya miradi ya umwagiliaji na uhifadhi wa vyanzo vya maji na mazingira ili kuhakikisha kilimo kinafanyika kwa vipindi vyote vya mwaka. Aidha, kuwekeza kwenye kilimo cha kisasa, mbegu bora zinazohimili mabadiliko ya tabianchi, na teknolojia za kuhifadhi chakula ili kupunguza mfumuko wa bei ya chakula. Kuendelea kutekeleza Mkakati wa Kugharamia Miradi ya Maendeleo kwa Kutumia Vyanzo Mbadala ikiwemo kuhusisha sekta binafsi.
2.	Madeni sanjari	Kusimamia utekelezaji wa Sheria ya Mikopo, Misaada na Dhamana, Sura 134 kwa kutoa dhamana kwenye miradi yenye tija na kufuatilia utendaji wa mashirika kwa mujibu wa mkataba/vigezo/makubaliano ya dhamana husika
3.	Mabadiliko ya tabianchi na majanga ya asili	Kuendelea na utekelezaji wa Mkakati wa Taifa wa Usimamizi wa Maafa 2022 - 2027 na kuimarisha Mfuko wa Taifa wa Maafa ili kukabiliana na athari za

Na	Kihatarishi	Hatua ya kukabiliana na kihatarishi
		<p>majanga pindi yanapotokea.</p> <p>Kuendelea kutenga rasilimali kwa ajili ya miradi ya umwagiliaji na uhifadhi wa vyanzo vya maji na mazingira ili kuhakikisha kilimo kinafanyika kwa vipindi vyote vya mwaka. Aidha, kuwekeza kwenye kilimo cha kisasa, mbegu bora zinazohimili mabadiliko ya tabianchi, na teknolojia za kuhifadhi chakula ili kupunguza mfumuko wa bei ya chakula</p> <p>Kuendelea kutekeleza Mpango Kabambe wa Taifa wa Hifadhi na Usimamizi wa Mazingira (2022-2032)</p>
4.	Migogoro ya kisiasa na mahusiano ya kidiplomasia	<p>Kuendelea kutekeleza Mkakati wa Taifa wa Kuimarisha Upatikanaji wa fedha za Kigeni</p> <p>Kuendelea kuongeza uzalishaji katika sekta ya kilimo, uzalishaji wa mbolea</p> <p>Kukuza masoko ya mitaji ya ndani</p>
5.	Udukuzi na shambulio la mifumo ya kielektroniki	<p>Kuendelea kuimarisha usalama katika mifumo ya kielektroniki ya usimamizi wa fedha za umma na shughuli za serikali</p> <p>Kuendelea kusimamia utekelezaji wa Kanuni za Maadili ya Utendaji katika Utumishi wa Umma za mwaka 2023 ili kudhibiti vitendo vya udanganyifu kwa watumishi wa umma.</p> <p>Kuendelea kuimarisha mifumo ya ufuatiliaji na tahadhari katika taasisi zote za umma ili kubaini changamoto zinazoweza kujitokeza na kuwezesha maamuzi ya kiutendaji kufanyika kwa wakati.</p>

4. MAELEKEZO YA MAANDALIZI YA MPANGO NA BAJETI KWA MWAKA 2025/26

36. Sehemu hii inatoa maelekezo yanayopaswa kuzingatiwa na Maafisa Masuuli wakati wa maandalizi, uwasilishaji, utekelezaji, ufuatiliaji na tathmini na utoaji wa taarifa za utekelezaji wa mpango na bajeti kwa mwaka 2025/26. Maafisa Masuuli wanapaswa kuzingatia sheria, kanuni, taratibu na miongozo iliyorejewa katika mwongozo huu ikiwemo na mabadiliko yanayotokea baada ya Mwongozo kuidhinishwa.

4.1 Maandalizi ya Mpango na Bajeti

37. Wakati wa maandalizi ya mpango na bajeti, Maafisa Masuuli wanaelekezwa kuzingatia malengo na shabaha za Dira ya Taifa ya Maendeleo 2025, Mpango wa Maendeleo wa Taifa wa Miaka Mitano 2021/22 – 2025/26, Ilani ya CCM ya Uchaguzi Mkuu wa Mwaka 2020, Mpango wa Maendeleo wa Mwaka 2025/26, mipango mkakati ya kitaasisi, na maagizo mengine yaliyotolewa na Serikali. Aidha, pamoja na kuzingatia maagizo na maelekezo yaliyoainishwa katika Mipango na Mikakati, Maafisa Masuuli wanapaswa kufungamanisha vipaumbele vya Mafungu na Taasisi zake ili kufikia shabaha ya pamoja katika matokeo tarajiwa.

4.1.1 Ratiba ya Maandalizi ya Mpango na Bajeti

38. Maafisa Masuuli wanaelekezwa kuandaa Mpango na Bajeti ya Muda wa Kati (MTEF) mara baada ya Mwongozo huu kuidhinishwa. Vitabu vya MTEF viwasilishwe Wizara ya Fedha na Tume ya Mipango wiki ya nne ya Januari, 2025, baada ya kuidhinishwa na Mamlaka husika. Vitabu vya MTEF kwa Wakala za Serikali, Taasisi na Mashirika ya Umma vitawasilishwa Ofisi ya Msajili wa Hazina kwa ajili ya uchambuzi kulingana na ratiba itakayotolewa. Aidha, vitabu vya MTEF vya Ofisi za Wakuu wa Mikoa na Mamlaka za Serikali za Mitaa viwasilishwe Wizara ya Fedha baada ya mapitio ya Ofisi ya Rais TAMISEMI. Vilevile, randama za bajeti zitawasilishwa kwenye Kamati za Kudumu za Bunge kwa kuzingatia ratiba itakayotolewa na Ofisi ya Waziri Mkuu-Sera, Bunge na Uratibu. Ratiba ya Maandalizi ya Mpango na Bajeti kwa Mwaka 2025/26 ni kama inavyoonekana katika **Jedwali Na.**

4.1

Jedwali Na. 4.1: Ratiba ya Maandalizi ya Mpango na Bajeti kwa Mwaka 2025/26

Mwezi	Shughuli
Agosti – Novemba 2024	Maandalizi na uidhinishwaji wa Mwongozo wa Maandalizi ya Mpango na Bajeti ya Serikali
Novemba 2024	Usambazaji wa Mwongozo wa Mpango na Bajeti ya Serikali
Novemba 2024 - Februari 2025	Maandalizi ya mipango na bajeti za Wizara, Idara Zinazojitegemea, Wakala wa Serikali; Ofisi za Wakuu wa Mikoa; Mamlaka za Serikali za Mitaa; Taasisi na Mashirika ya Umma
Januari - Februari 2025	Kuwasilisha na kuidhinishwa kwa Waraka wa Baraza la Mawaziri kuhusu Mapendekezo ya Mfumo na Ukomo wa Bajeti ya Serikali kwa mwaka 2025/26
Januari - Mei 2025	Kufanya majadiliano kuhusu mapendekezo ya maboresho ya Mfumo wa Kodi
Februari – Machi 2025	Wizara ya Fedha, Tume ya Mipango na Ofisi ya Msajili wa Hazina kufanya uchambuzi wa mipango na bajeti za kisekta na mafungu
Machi 2025	Kuwasilisha randama Ofisi ya Waziri Mkuu – Sera, Bunge na Uratibu tarehe 10 Machi kulingana na Kanuni 115 (1) na (2) ya Kanuni za Kudumu za Bunge Toleo la 2023
Machi 2025	Kuwasilisha kwenye Kamati ya Bunge Mapendekezo ya Mfumo na Ukomo wa Bajeti ya Serikali kwa mwaka 2025/26
Machi 2025	Mafungu kuwasilisha mipango na bajeti kwenye Kamati za Kisekta za Bunge
Aprili – Juni 2025	Mafungu kuwasilisha mipango na bajeti bungeni
Juni 2025	Serikali kuwasilisha bungeni Muswada wa Sheria ya Fedha na Sheria ya Matumizi
1 Julai 2025 - 30 Juni 2026	Utekelezaji wa mipango na bajeti kama ilivyoidhinishwa na Bunge

4.1.2 Uingizaji wa Takwimu za Bajeti ya Serikali kwenye Mifumo ya Kibajeti

39. Maafisa Masuuli wote wanaelekezwa kuhakikisha kuwa, uingizaji wa takwimu za bajeti kwenye mifumo ya maandalizi ya bajeti unazingatia muda uliopangwa ikiwemo masuala muhimu yafuatayo:

- (i) Kufungamanisha shughuli zinazotengewa bajeti na Mpango wa Tatu wa Maendeleo wa Taifa wa Miaka Mitano 2020/21-2025/26 na Ilani ya Uchaguzi ya CCM ya 2020 kwa usahihi;
- (ii) Kuzingatia ukomo wa bajeti wa mwaka 2025/26 na makisio yanayoonesha uhalisia kulingana na ukomo wa miaka miwili inayofuata (2026/27 hadi 2027/28);
- (iii) Kutumia kwa usahihi namba za miradi, mageresho ya kibajeti (GFS codes 2014), na vizio vya vipimo kama vilivyoainishwa kwenye mifumo;

- (iv) Kuhakikisha kuwa takwimu za bajeti ya mishahara, matumizi mengineyo na miradi ya maendeleo zinazoingizwa kama *transfers* zinakasimiwa katika vifungu husika; na
- (v) Kuingiza viwango sahihi vya stahili za kisheria ikiwemo posho, pango, umeme, simu na maji kwa kuzingatia miongozo inayotolewa na Ofisi ya Rais - Menejimenti ya Utumishi wa Umma na Utawala Bora (OR – MUUUB).

4.1.3 Uwasilishaji wa Mpango na Bajeti (MTEF)

40. Wakati wa uwasilishaji wa mpango na bajeti, Maafisa Masuuli wanaelekezwa kuzingatia yafuatayo:

- (i) Uwasilishaji wa MTEF uzingatie muundo uliooneshwa katika **Kiambatisho Na. 1E**;
- (ii) Kuzingatia ratiba ya uwasilishaji wa mpango na bajeti kama ilivyoainishwa katika Jedwali Na.4.1;
- (iii) Wizara, Idara Zinazojitegemea, Wakala za Serikali na Ofisi za Wakuu wa Mikoa zinatakiwa kuwasilisha Wizara ya Fedha na Tume ya Mipango nakala ngumu mbili (2) za makadirio ya mapato na matumizi ya fungu husika, siku tano (5) kabla ya kuanza uchambuzi kwa kuzingatia ratiba ya uchambuzi;
- (iv) Wakala za Serikali, Taasisi na Mashirika ya Umma zinaelekezwa kuwasilisha Ofisi ya Msajili wa Hazina nakala tete ya makadirio ya mapato na matumizi kwa kuzingatia ratiba itakayotolewa na Ofisi hiyo;
- (v) Mamlaka za Serikali za Mitaa kupitia Ofisi za Wakuu wa Mikoa zinaelekezwa kuwasilisha makadirio ya mapato na matumizi OR-TAMISEMI kwa kuzingatia ratiba itakayotolewa na Ofisi hiyo. Aidha, OR-TAMISEMI itawasilisha HAZINA Taarifa jumuishi ya fomu namba 3B, 4, 6 na 8B kwa mafungu yote ikiwa katika nakala tete zenye muundo wa *excel* au *access*; na
- (vi) Wizara, Idara Zinazojitegemea, Wakala za Serikali na Ofisi za Wakuu wa Mikoa zinaelekezwa kuwasilisha Wizara ya Fedha, Tume ya Mipango, OR – TAMISEMI na Ofisi ya Msajili wa Hazina nakala ngumu moja (1) na nakala tete zilizofanyiwa marekebisho ndani ya siku tano (5) baada ya bajeti ya fungu husika kuidhinishwa na Bunge.

4.1.4 Uwasilishaji wa Randama

41. Maafisa Masuuli wanaelekezwa kuwasilisha randama kwa Katibu wa Bunge na nakala Ofisi ya Waziri Mkuu (Sera, Bunge na Uratibu) kabla au ifikapo tarehe 10 Machi, 2025 kwa mujibu wa Kanuni 115 (1) na (2) ya Kanuni za Kudumu za Bunge Toleo la 2023. Aidha, Maafisa Masuuli wanaelekezwa kuwasilisha randama za utekelezaji wa Mwaka 2024/25 na mpango na bajeti wa Mwaka 2025/26 kwenye Kamati za Kudumu za Bunge za Kisekta kwa kuzingatia ratiba ya vikao vya kamati husika itakayotolewa na Katibu wa Bunge. Muundo wa uwasilishaji wa randama ni kama unavyoonekana katika **Kiambatisho Na. 1F**.

Tanbihi: Taarifa za ziada zitakazohitajika nje ya muundo wa randama ziwasilishwe kama kiambatisho kwenye randama.

4.2 Maelekezo ya Uandaaji wa Mpango na Bajeti

42. Sehemu hii inatoa maelekezo kuhusu Kamati za Bajeti, viwango vya ubadilishaji wa fedha za kigeni, mkakati wa kuongeza fedha za kigeni na mapato. Maeneo mengine ni udhibiti wa uzalishaji na ulimbikizaji wa madeni, uandaaji wa bajeti ya mishahara, uendeshaji wa ofisi na maendeleo.

4.2.1 Kamati za Bajeti

43. Katika uandaaji na utekelezaji wa Mpango na Bajeti kwa Mwaka 2025/26, Maafisa Masuuli wanaelekezwa kuhakikisha:

- (i) Kamati za Bajeti zinaimarishwa na wajumbe wote kushiriki kikamilifu katika kuandaa na kutekeleza bajeti kwa mujibu wa Kifungu 18(2) na Kanuni ya 17(3) ya Sheria ya Bajeti, Sura 439;
- (ii) Vikao vya Kamati za Bajeti vifanyike kwa ajili ya; kupitia mikakati ya ukusanyaji wa mapato, ugawaji wa rasilimali fedha zilizopokelewa/kukusanywa na kupitia taarifa za ufuatiliaji na tathmini ya utekelezaji wa mpango na bajeti; na
- (iii) Taarifa ya vikao hivyo iandaliwe kwa kuzingatia muundo uliobainishwa kwenye **Kiambatisho Na. 1G** cha mwongozo huu na kuwasilishwa Wizara ya Fedha kila robo mwaka.

4.2.2 Maelekezo ya Kuimarisha Ukusanyaji wa Mapato

44. Maafisa Masuuli wanaelekezwa kuwa na mikakati ya kuongeza mapato na ufanisi katika ukusanyaji wa mapato ili kufikia malengo ya Serikali kwa kufanya yafuatayo:

- (i) Kuhakikisha kuwa mapato yote yanayokusanywa yanaingizwa Mfuko Mkuu wa Hazina ya Serikali kwa mujibu wa matakwa ya Kifungu 58(a) cha Sheria ya Bajeti, Sura 439 isipokuwa pale ilipoelekezwa vinginevyo kwa mujibu wa Sheria husika;
- (ii) Kuandaa, kuhuisha na kutekeleza mikakati ya kuongeza mapato katika maeneo wanayosimamia kwa kuzingatia sheria, kanuni na miongozo iliyopo na kuiwasilisha Wizara ya Fedha wakati wa uchambuzi wa mpango na bajeti;
- (iii) Kuwajengea uwezo viongozi na watendaji kuhusu mbinu za ukusanyaji wa mapato na kudhibiti mianya ya upotevu wa mapato ya Serikali;
- (iv) Kuandaa na kuhuisha kanzidata na takwimu za vyanzo vyote vya mapato katika ngazi zote ikijumuisha kata, vijiji na mitaa kwa lengo la kuimarisha ukusanyaji na udhibiti wa upotevu wa mapato kila mwaka;
- (v) Kuhakikisha matumizi sahihi ya mifumo ya kielektroniki ya Serikali ya ukusanyaji wa mapato kwa kufanya uhakiki, usuluhishi na ukaguzi wa mifumo mara kwa mara kwenye vituo vyote vya makusanyo ili kudhibiti mianya ya upotevu wa mapato;
- (vi) Kuzingatia sheria za kodi ikiwa ni pamoja na kutoza kodi ya zuio (withholding tax) na kudai risiti za kielektroniki (EFD) kwa malipo yote yanayofanywa kwa wazabuni na wakandarasi;
- (vii) Kutoingia mikataba na wazabuni, wakandarasi na watoa huduma wasiotumia mashine za kielektroniki (EFD) kutoa stakabadhi;

- (viii) Kuwasilisha Wizara ya Fedha kila mwezi taarifa za makusanyo kutoka kila chanzo cha mapato kwa kuzingatia utaratibu uliowekwa kwa lengo la kutathmini mwenendo wa ukusanyaji wa mapato ya Serikali;
- (ix) Wizara zenye dhamana ya masuala ya biashara na uwekezaji ziratibu uanzishwaji wa dirisha la pamoja la kielektroniki la utoaji wa huduma na kuboresha mifumo ya ukusanyaji wa mapato kwa taasisi zinazotoa huduma kwa pamoja, ili kuwezesha utoaji wa namba jumuishi kwa lengo la kurahisisha ulipaji kodi, ada na tozo za Serikali kwa wateja na hivyo kuongeza uhiari wa ulipaji;
- (x) Kushirikisha wadau mapendekezo ya uanzishaji au mabadiliko ya viwango vya kodi, ushuru na tozo kabla ya kuwasilisha Wizara ya Fedha;
- (xi) Kuanzisha na kuimarisha usimamizi wa vituo vya makusanyo hususan katika maeneo ya mipaka, viwanja vya ndege, bandari pamoja na vituo vya ukaguzi kwa kutumia mifumo ya kielektroniki ili kutambua na kudhibiti mianya ya upotevu wa mapato;
- (xii) Kutumia fursa na changamoto zilizopo kuibua vyanzo vipya vya mapato na kutenga bajeti kwa ajili ya kuanzisha na kuwekeza katika miradi ya kimkakati ili kuongeza wigo wa ukusanyaji wa mapato ya Serikali; na
- (xiii) Kuhakikisha gawio na michango stahiki inawasilishwa Mfuko Mkuu wa Hazina ya Serikali kwa wakati.

4.2.3 Kiwango cha Ubadilishaji Fedha

45. Maafisa Masuuli wanaelekezwa kutumia kiwango elekezi cha ubadilishaji wa fedha za kigeni ambacho ni dola moja ya Marekani kwa shilingi za Tanzania 2,888.48 wakati wa maandalizi ya Mpango na Bajeti kwa Mwaka 2025/26.

4.2.4 Uibuaji wa Miradi Mipya

46. Maafisa Masuuli wanaelekezwa kuweka kipaumbele cha kukamilisha miradi inayoendelea wakati wa maandalizi ya bajeti ya 2025/26 kabla ya kuibua miradi mipya. Aidha, miradi itakayopewa kipaumbele ni ile inayochochea ukuaji wa shughuli za kiuchumi ikiwa ni pamoja na kuongeza fursa za ajira.

4.2.5 Bajeti ya Mishahara

47. Wakati wa maandalizi ya ikama na bajeti ya mishahara kwa mwaka 2025/26, Maafisa Masuuli wanaelekezwa yafuatayo:

- (i) Kutenga bajeti ya upandishaji vyeo, ajira mpya, nyongeza ya mishahara ya mwaka, ubadilishaji kada/kazi, uhamisho na uteuzi kwa kuzingatia Mwongozo wa Uandaaji wa Ikama na Makadirio ya Bajeti ya Mishahara kwa Mwaka 2025/26 kutoka Ofisi ya Rais - Menejimenti ya Utumishi wa Umma na Utawala Bora (OR-MUUUB);
- (ii) Kuzingatia Mpango wa Rasilimaliwatu uliopo wakati wa utengaji wa bajeti ya mishahara ili kuwa na msawazo wa watumishi katika Utumishi wa Umma;
- (iii) Wakala za Serikali, Taasisi, Mashirika ya Umma na Mamlaka za Serikali za Mitaa yanayolipa mishahara kwa makusanyo ya ndani na zinazopelekewa

fedha kutoka Mfuko Mkuu wa Hazina ya Serikali kuhakikisha yanatenga kiwango sahihi cha michango ya kisheria ya watumishi na kuwasilisha kwa wakati katika mifuko husika ili kuepuka tozo inayotokana na ucheleweshaji wa michango hiyo na usumbufu kwa watumishi pindi wanapostaafu;

- (iv) Kuandaa bajeti ya mishahara kwa kuzingatia Waraka wa Watumishi wa Serikali Na. 3 wa Mwaka 2022 na Nyaraka za Msajili wa Hazina Na. 3, 4, 5, 6, 7, 8 na 9 za Mwaka 2022 kuhusu Marekebisho ya Mishahara kwa Watumishi wa Umma na Taasisi za Serikali;
- (v) Kuzingatia Waraka wa Utumishi wa Umma Na. 1 wa Mwaka 2021 kuhusu Matumizi ya Mfumo Jumuishi wa Usimamizi wa Taarifa za Rasilimaliwatu na Mishahara (e-Watumishi);
- (vi) Bajeti ya mishahara ya ajira mpya na kupandisha vyeo watumishi wa kada za ardhi waliokuwa katika Mamlaka za Serikali za Mitaa itengwe na Wizara ya Ardhi, Nyumba na Maendeleo ya Makazi kwa kuwa ndio Mamlaka inayosimamia watumishi hao; na
- (vii) Kuzingatia gharama za marekebisho, visahihisho na nyongeza mbalimbali katika miundo ya maendeleo ya utumishi ya kada chini ya Wizara wakati wa kutenga bajeti ya mishahara na kusafisha taarifa za watumishi katika mfumo wa e-Watumishi.

4.2.6 Bajeti ya Matumizi Mengineyo

48. Wakati wa maandalizi ya makadirio ya bajeti ya matumizi mengineyo, Maafisa Masuuli wanaelekezwa kuzingatia yafuatayo:

- (i) Kutenga bajeti kwa ajili ya kuwezesha ukusanyaji wa mapato ya Serikali;
- (ii) Kutenga bajeti kwa ajili ya kugharamia mikakati ya kukabiliana na vihatarishi vya utekelezaji wa mpango na bajeti;
- (iii) Kutenga bajeti kwa kuzingatia mabadiliko ya miundo mipya ya Taasisi ikiwemo vitengo vya Ufuatiliaji na Tathmini pamoja na Tafiti na Ubunifu;
- (iv) Kutenga bajeti ya kugharamia shughuli za uendeshaji wa ofisi na kulipa stahili za kisheria kwa watumishi (posho za kujikimu, uhamisho, stahili za viongozi na likizo) ili kuepuka uzalishaji wa madeni;
- (v) Kutenga bajeti kwa ajili ya kuwajengea uwezo watumishi ikijumuisha bajeti ya mafunzo ya matumizi ya mifumo ya usimamizi wa fedha za umma (bajeti, ununuzi na uhasibu), upimaji utendaji kazi wa watumishi na taasisi na usimamizi wa rasilimali watu;
- (vi) Kutenga bajeti ya kutekeleza shughuli za Fungu zinazohusisha ushiriki wa Mafungu mengine;
- (vii) Kutenga bajeti kwa ajili ya kuimarisha matumizi ya TEHAMA katika uendeshaji wa shughuli za Serikali kwa lengo la kurahisisha utendaji kazi kupunguza matumizi na;
- (viii) Kutenga bajeti kwa ajili ya kugharamia michezo kwa watumishi.

4.2.7 Bajeti ya Maendeleo

49. Maafisa Masuuli wanaelekezwa kuandaa makadirio ya bajeti ya miradi ya maendeleo kwa kuzingatia yafuatayo:

- (i) Kuwasilisha Wizara ya Fedha takwimu za miadi ya fedha kutoka kwa Washirika wa Maendeleo robo ya kwanza ya kila mwaka wa fedha ili kukamilisha maandalizi ya ukomo wa bajeti za mafungu wa mwaka unaofuata;
- (ii) Kuhakikisha kuwa miradi inayotekelezwa kwa fedha kutoka kwa Washirika wa Maendeleo inajumuishwa katika bajeti ya Serikali pamoja na kupata namba ya mradi kutoka Wizara ya Fedha ili kuwezesha kuhasibiwa kwa fedha hizo;
- (iii) Wizara za Kisekta ziwasilishe Wizara ya Fedha mchanganuo wa shughuli na bajeti zinazotekelezwa kwenye mafungu mengine ikiwemo Mamlaka za Serikali za Mitaa ili kujumuishwa kwenye ukomo wa bajeti wa mafungu husika wiki ya kwanza ya Desemba, 2024;
- (iv) Mwongozo wa Usimamizi wa Uwekezaji wa Umma wa Mwaka 2022 kuhusu uibuaji, ugharamiaji, utekezaji na ufuatiliaji na tathmini ya miradi ya maendeleo;
- (v) Kifungu cha 6 cha Sheria ya Kodi ya Ongezeko la Thamani (VAT), Sura 148 kuhusu utaratibu wa kutoa msamaha wa VAT kwa miradi inayotekelezwa kwa fedha za Serikali na Washirika wa Maendeleo na kuwasilisha maombi ya msamaha wa kodi ya VAT kupitia mfumo wa kielektroniki;
- (vi) Sheria ya Mikopo, Dhamana na Misaada, Sura 134 inayoelekeza kutoingia mikataba ya makubaliano na Washirika wa Maendeleo ya kupokea misaada na mikopo pasipo idhini ya Waziri mwenye dhamana na masuala ya Fedha;
- (vii) Kanuni ya 5(b) ya Sheria ya Mikopo, Dhamana na Misaada, Sura 134 inayoelekeza kuwa mikataba yote ya mikopo itakayosainiwa inapaswa kuzingatia miradi ya kimkakati inayozalisha mapato (investment projects) na maeneo ya vipaumbele;
- (viii) Kutenga mchango wa Serikali (counterpart fund) katika miradi ya maendeleo inayotekelezwa kwa ushirikiano na Washirika wa Maendeleo;
- (ix) Kukamilisha taratibu zote za maandalizi ya mradi ikiwemo upembuzi yakinifu na tathmini ya athari za mazingira na jamii kabla ya kuanza utekezaji wa mradi;
- (x) Kutenga bajeti ya kugharamia fidia katika maeneo yanayotwaliwa kwa ajili ya utekezaji wa miradi;
- (xi) Kutumia njia mbadala kwa ajili ya kugharamia miradi ya maendeleo (Alternative Project Financing - hati fungani, mikopo na PPP) yenye mlengo wa kibiashara kwa kuzingatia sheria, kanuni, miongozo na taratibu zilizopo;
- (xii) Kuzingatia matakwa ya Sheria ya Ununuzi wa Umma, Sura 410 iliyoweka ukomo wa zabuni zinazoweza kutolewa kwa wasio wazawa ili kuwawezesha wazawa (local content) na kuongeza mzunguko wa fedha katika uchumi;
- (xiii) Kutenga bajeti kwa ajili ya kugharamia shughuli za utafiti na maendeleo kwa kutumia mapato ya ndani ya taasisi na ruzuku kutoka Serikali Kuu;
- (xiv) Kutenga bajeti kwa ajili ya upimaji na upatikanaji wa hati miliki ya maeneo yanayomilikiwa na taasisi za umma;

- (xv) Kuzingatia masuala ya mazingira na mabadiliko ya tabianchi pamoja na masuala ya jamii katika upangaji wa bajeti ya miradi ya maendeleo;
- (xvi) Kujenga uwezo kwa Wizara, Idara Zinazojitegemea, Wakala za Serikali, Taasisi, Mashirika ya Umma, Ofisi za Wakuu wa Mikoa na Mamlaka za Serikali za Mitaa kuhusu dhana ya PPP;
- (xvii) Kuzingatia matumizi ya Mfumo wa Kitaifa wa Kusimamia Miradi ya Maendeleo (NPMIS); na
- (xviii) Ushirikishaji wa sekta husika katika utekelezaji wa miradi inayohusisha sekta zaidi ya moja kabla, wakati na baada ya utekelezaji.

4.2.8 Mkakati wa Kuongeza Fedha za Kigeni

50. Katika kutekeleza mkakati wa kuongeza fedha za kigeni kwa kuzingatia Mkakati wa Taifa wa Kuimarisha Upatikanaji wa Fedha za Kigeni, Maafisa Masuuli wanaelekezwa kuendelea:

- (i) Kusimamia utekelezaji wa kifungu cha 26 cha Sheria ya Benki Kuu, Sura 197, na Sheria ya Fedha za Kigeni, Sura 271 na Kanuni zake kwa lengo la kudhibiti matumizi yasiyo ya lazima ya fedha za kigeni;
- (ii) Kutekeleza Mikakati ya Wizara ya Kukabiliana na Uhaba wa Fedha za Kigeni inayobainisha hatua zinazopaswa kuchukuliwa ili kuimarisha akiba ya fedha za kigeni;
- (iii) Kuhakikisha mikataba ya ndani mipya inayoingiwa inatumia shilingi ya Tanzania kwa lengo la kupunguza uhitaji wa matumizi ya fedha za kigeni yasiyo ya lazima. Pia, kuhakikisha mikataba ya zamani iliyoingiwa kwa fedha za kigeni inafanyiwa mapitio;
- (iv) Kuongeza uzalishaji wa bidhaa na huduma kwa mauzo ya nje;
- (v) Kuimarisha uzalishaji wa bidhaa na huduma mbadala ili kupunguza matumizi ya fedha za kigeni;
- (vi) Kuendelea kuboresha mazingira ya biashara na uwekezaji ili kuvutia mitaji kutoka nje ya nchi ikiwemo watanzania waliopo nje ya nchi kuwekeza na kutuma fedha za kigeni; na
- (vii) Kusimamia utekelezaji wa kifungu cha 60 cha Sheria ya Ununuzi wa Umma, Sura 410 inayoagiza kutoa kipaumbele kwa bidhaa na huduma za ndani ili kupunguza matumizi ya fedha za kigeni, kuimarisha soko la ndani, kulinda viwanda vya ndani na kuongeza ajira.

4.2.9 Mikakati ya Ulipaji na Udhibiti wa Ulimbikizaji wa Madeni

51. Katika kudhibiti uzalishaji na ulimbikizaji wa madeni, Maafisa Masuuli wanapaswa kuzingatia:

- (i) Kifungu cha 52 (1-2) cha Sheria ya Bajeti, Sura 439 kinachohusu mfumo wa udhibiti wa miadi;
- (ii) Maelekezo ya *Treasury Circular No. 2 of 2022/23 on Government Domestic Expenditure Arrears and Other Outstanding Obligations* kwa lengo la kuendelea kusimamia na kutekeleza Mkakati wa Kudhibiti na Kuzuia Malimbikizo ya Madeni;

- (iii) Kutenga bajeti kwa ajili ya kugharamia ulipaji wa madeni kwa kuzingatia miongozo na Sheria ya Fedha za Umma, Sura 348;
- (iv) Ulipaji wa madeni uzingatie umri wa madeni pamoja na kutoa kipaumbele kwenye madeni yenye riba na adhabu; na
- (v) Kuhakikisha madai yanayotokana na bidhaa au huduma katika mwaka wa utekelezaji wa bajeti yanalipwa kwa wakati na kiasi stahiki kwa kutumia fedha za migao/makusanyo ya kila mwezi ili kuepuka uzalishaji wa madeni.

4.2.10 Udhhibiti wa Matumizi ya Fedha za Umma

52. Maafisa Masuuli wanaelekezwa kusimamia nidhamu na uwajibikaji kwa matumizi ya fedha za umma kwa kuzingatia yafuatayo:

- (i) Kuhakikisha kuwa fedha zote zinazopokelewa/zinazokusanywa zinatumika kwa wakati kwa mujibu wa mpango kazi ili kuepuka fedha hizo kuvuka mwaka wa fedha husika;
- (ii) Kutekeleza Mwongozo wa Utaratibu wa Maombi na Utoaji wa Fedha za Utekelezaji wa Bajeti ya Serikali wa mwaka 2021 unaosisitiza kutoingia mikataba bila kuwa na bajeti ya shughuli husika;
- (iii) Kuhakikisha ushirikishwaji wa taasisi za kisekta unazingatiwa wakati wa upangaji na utekelezaji wa miradi;
- (iv) Kuimarisha utendaji wa Kamati za Bajeti, vitengo vya ukaguzi wa ndani pamoja na ufuatiliaji na tathmini ili kudhibiti matumizi ya fedha za umma ikiwemo miradi inayotekelezwa kwa fedha kutoka kwa Washirika wa Maendeleo; na
- (v) Kutumia Mfumo wa Kielektroniki wa Ununuzi wa Umma (National e-Procurement System of Tanzania - NeST) katika ununuzi wa bidhaa, huduma na kandarasi pamoja na kuzingatia bei ya soko wakati wa ununuzi.

4.3 Maelekezo Mahsusi kwa Wakala za Serikali, Taasisi na Mashirika ya Umma

53. Watendaji Wakuu wa Wakala za Serikali, Taasisi na Mashirika ya Umma wanaelekezwa yafuatayo:

- (i) Kuhakikisha mifuko ya hifadhi ya jamii inakuwa na taarifa sahihi za wanachama ili kuondoa usumbufu wakati wa kustaafu au kumaliza mikataba ya kazi;
- (ii) Kuhakikisha taasisi za kibiashara na za kimkakati zinazingatia Waraka wa Msajili wa Hazina Na.1 wa mwaka 2023, katika kuimarisha mfumo wa usimamizi na utendaji kazi;
- (iii) Kuhakikisha taasisi zinatenga michango ya asilimia 15 ya mapato ghafi na kuwasilishwa Mfuko Mkuu wa Hazina ya Serikali kwa kuzingatia kifungu cha 8(1)(f) cha Sheria ya Msajili wa Hazina (Madaraka na Majukumu), Sura 370;
- (iv) Kuwasilisha asilimia 70 ya ziada ya mapato katika Mfuko Mkuu wa Hazina ya Serikali kwa kuzingatia kifungu cha 10(2) cha Sheria ya Msajili wa Hazina (Madaraka na Majukumu), Sura 370;
- (v) Kuhakikisha maombi ya kuvuka mwaka na fedha yanawasilishwa Ofisi ya Msajili wa Hazina na zinatumika kwa malengo yaliyopangwa awali kulingana na sheria na kanuni. Aidha, Ofisi ya Msajili wa Hazina inapaswa kuwasilisha

Wizara ya Fedha maombi ya kuvuka mwaka na fedha kwa kuzingatia kifungu cha 29 (2-3) cha Sheria ya Bajeti, Sura 439;

- (vi) Kuhakikisha maombi ya uhamisho wa bajeti yanawasilishwa Ofisi ya Msajili wa Hazina ili awasilishe Wizara ya Fedha kwa kuzingatia kifungu cha 28 (1-4) cha Sheria ya Bajeti, Sura 439;
- (vii) Kuhakikisha taasisi zinazodaiwa na taasisi nyingine za umma zinatenga bajeti na kulipa madeni hayo kwa wakati;
- (viii) Kuandaa na kuwasilisha Ofisi ya Msajili wa Hazina mikakati ya kuongeza mapato katika maeneo wanayosimamia kwa kuzingatia sheria, kanuni na miongozo iliyopo;
- (ix) Kuzingatia maelekezo ya Katibu Mkuu OR-MUUUB kuhusu siku za likizo na malipo ya nauli ya likizo yaliyotolewa kwa barua yenye Kumb. Na. CAC.17/228/01/07 ya tarehe 09 Novemba, 2023.

4.4 Maelekezo kwa Ofisi za Wakuu wa Mikoa na Mamlaka za Serikali za Mitaa

54. Sehemu hii inatoa maelekezo yanayopaswa kufuatwa na Maafisa Masuuli wa Ofisi za Wakuu wa Mikoa na Mamlaka za Serikali za Mitaa wakati wa maandalizi ya Mpango na Bajeti ya Mwaka 2025/26.

4.4.1 Maelekezo kwa Ofisi za Wakuu wa Mikoa

55. Wakati wa maandalizi ya Mpango na Bajeti ya Mwaka 2025/26, Maafisa Masuuli wa Ofisi za Wakuu wa Mikoa wanaelekezwa kuzingatia yafuatayo:

- (i) Kuendelea kutenga bajeti kwa ajili ya kusimamia na kudumisha masuala ya usalama ikiwemo kugharamia vikao vya Kamati za Usalama ngazi ya Mkoa, Wilaya na Vikao vya Kisheria katika Tarafa;
- (ii) Kutenga bajeti kwa ajili ya ukarabati, ukamilishaji na ujenzi wa ofisi na makazi ya Wakuu wa Mikoa, Makatibu Tawala wa Mikoa na Wilaya, Wakuu wa Wilaya na Maafisa Tarafa;
- (iii) Kutenga bajeti kwa ajili ya kuhuisha Wasifu wa Uwekezaji na kufanya makongamano ya uwekezaji;
- (iv) Kusimamia na kuratibu utekelezaji wa Ilani ya CCM ya Uchaguzi Mkuu wa Mwaka 2020 na kutoa taarifa kila nusu mwaka na kwa mwaka kwa OR-TAMISEMI;
- (v) Kutenga bajeti kwa ajili ya kujikinga dhidi ya majanga pamoja na maafa mbalimbali ikiwemo moto, mafuriko na mlipuko wa magonjwa;
- (vi) Kuandaa Mipango ya Hifadhi ya Mazingira (Local Environmental Action Plans) kulingana na changamoto za Mazingira katika mikoa na kuhakikisha fedha zinatengwa kwa ajili utekelezaji wa Mipango hiyo;
- (vii) Kutumia mfumo jumuiishi wa ufuatiliaji na tathimini (Intergrated Monitoring and Evaluation System- iMES) katika shughuli za miradi ya maendeleo kwenye Mamlaka za Serikali za Mitaa;
- (viii) Kusimamia utoaji wa mikopo ya asilimia 10 kupitia mwongozo mpya wa mwaka 2024 kwa vikundi vya wajasiriamali wanawake, vijana na watu wenye ulemavu; na

- (ix) Kusimamia uandaaji na utekelezaji wa Mpango wa Wajibu wa Makampuni katika Jamii (Corporate Social Responsibility- CSR).

4.4.2 Maelekezo Mahsusi kwa Mamlaka za Serikali za Mitaa

56. Wakati wa maandalizi ya Mpango na Bajeti ya Mwaka 2025/26, Maafisa Masuuli wa Mamlaka za Serikali za Mitaa wanaelekezwa kuzingatia yafuatayo:

- (i) Kuandaa na kujumuisha kwenye Mpango na Bajeti makadirio ya mapato na matumizi ya Kata, Vijiji/Mitaa na vituo vya kutolea huduma;
- (ii) Kutenga bajeti ya miundombinu wezeshi kwa ajili ya matumizi ya Serikali Mtandao na kuimarisha matumizi ya TEHAMA katika Mamlaka za Serikali za Mitaa;
- (iii) Kutenga bajeti kwa ajili ya kukamilisha miradi viporo hususan maboma yaliyoanzishwa kwa nguvu za wananchi;
- (iv) Kutenga na kutoa mikopo ya asilimia 10 kwa vikundi vya wajasiriamali vya wanawake, vijana na watu wenye ulemavu kwa kutumia mwongozo wa mwaka 2024;
- (v) Kutenga bajeti kwa ajili ya miradi ya kimkakati inayogusa mawanda mapana ya wananchi kwa halmashauri zinazochangia asilimia 70, 60 na 40 ya fedha za maendeleo kwa mapato ya ndani;
- (vi) Kutenga bajeti kwa ajili ya kupima maeneo ya taasisi zilizopo katika Halmashauri ambazo ni pamoja na shule, vituo vya kutolea huduma za afya, ofisi za halmashauri, kata, vijiji/mitaa na vitongoji;
- (vii) Kwa kuzingatia ufinyu wa ardhi katika Halmashauri za majiji, manispaa na miji, utengaji wa bajeti ya ujenzi, ukarabati na uendelezaji wa miundombinu ya elimu, afya na vitega uchumi uzingatie muundo wa ujenzi wa ghorofa;
- (viii) Kutenga bajeti kwa ajili ya kuwatambua, kuwasajili na kuwapanga wafanyabiashara wadogo (wamachinga) katika maeneo maalumu ikiwemo ujenzi na ukarabati wa miundombinu ya kufanyia biashara;
- (ix) Kutenga bajeti kwa ajili ya kulipa fidia maeneo yaliyotwaliwa na yatakayotwaliwa na halmashauri kwa ajili ya ujenzi wa miundombinu ya umma;
- (x) Kuandaa Mipango ya Hifadhi ya Mazingira (Local Environmental Action Plans) kwa kuzingatia changamoto za Mazingira katika Halmashauri husika na kutenga fedha kwa ajili ya utekelezaji;
- (xi) Kutenga bajeti ya kulipa madeni ya watumishi, wazabuni na wakandarasi;
- (xii) Halmashauri zinazodaiwa fedha za mkopo wa mradi wa kupima, kupanga na kumilikisha ardhi zinapaswa kutenga fedha kwa ajili ya kurejesha mkopo huo Wizara ya Ardhi, Nyumba na Maendeleo ya Makazi;
- (xiii) Kutenga bajeti kwa ajili ya kufanya upembuzi yakinifu wa miradi ya kuzalisha mapato kabla ya kuanza utekelezaji;
- (xiv) Kutenga bajeti kwa ajili ya kufanya msawazo wa watumishi katika Mamlaka za Serikali za Mitaa;
- (xv) Kutenga bajeti kwa ajili ya ujenzi, ukarabati na ukamilishaji wa majengo ya utawala ya Ofisi za Halmashauri, Kata na Vijiji/Mitaa;

- (xvi) Kutenga kiasi kisichopungua shilingi 200,000 kutokana na mapato ya ndani ya Halmashauri kwa ajili ya uendeshaji wa ofisi kwa kila Kata, Kijiji/Mtaa kila robo mwaka. Aidha, kwa Halmashauri zinazokusanya mapato chini ya shilingi bilioni 1.5 zinaelekezwa kutenga kiasi kisichopungua shilingi 100,000 kwa Kata, Kijiji/Mtaa kila robo mwaka;
- (xvii) Kuendelea kutenga shilingi 100,000 kila mwezi kwa ajili ya posho ya madaraka ya watendaji wa kata;
- (xviii) Kutenga na kurejesha bajeti ya mapato yatokanayo na mazao ya kilimo (asilimia 20), mifugo (asilimia 15) na uvuvi (asilimia 5) ili kuboresha na kuendeleza sekta hizo;
- (xix) Kufunga Mfumo wa Kielektroniki wa Usimamizi na Uendeshaji wa Vituo vya Kutolea Huduma za Afya Tanzania (Centralized GoT – HoMIS) kwa Mamlaka za Serikali za Mitaa katika vituo ambavyo bado havijafunga mfumo huo;
- (xx) Kutenga bajeti kupitia mapato ya ndani kwa ajili ya kuchangia Bodi ya Mikopo ya Serikali za Mitaa kulingana na Sheria ya Serikali za Mitaa, Sura 290;
- (xxi) Halmashauri ambazo zimepata mkopo kutoka Bodi ya Mikopo ya Serikali za Mitaa kutenga bajeti kutoka kwenye mapato yao ya ndani kwa ajili ya marejesho ya mkopo;
- (xxii) Mwongozo wa Uanzishaji na Usimamizi wa Kampuni Mahsusi za Uendeshaji wa Miradi ya Vitega Uchumi kwenye Mamlaka ya Serikali za Mitaa;
- (xxiii) Kutenga bajeti kwa ajili ya utekelezaji wa shughuli za ustawi wa jamii;
- (xxiv) Kusimamia na kutekeleza uandaaji wa Mpango wa Wajibu wa Makampuni katika Jamii (Corporate Social Responsibility- CSR);
- (xxv) Kutambua na kurasimisha shughuli za kiuchumi zisizo rasmi ili kuongeza wigo wa ukusanyaji wa mapato;
- (xxvi) Kutenga bajeti kwa ajili ya uhamasishaji wa matumizi ya huduma ndogo za fedha ili kuwezesha wananchi kutumia huduma rasmi za fedha;
- (xxvii) Kutenga bajeti za matengenezo na mafuta ya vyombo vya usafiri kwa Watendaji wa Kata ili kuwezesha ufuatiliaji wa shughuli za ukusanyaji na usimamizi wa mapato na mikopo ya asilimia 10;
- (xxviii) Kutenga bajeti kwa ajili ya kamati za ushauri wa kisheria na kamati ya msaada wa kisheria ya Mkoa; na
- (xxix) Kuendelea kutenga fedha za mapato ya ndani kwa ajili ya utekelezaji wa miradi ya maendeleo kwa kuzingatia madaraja ya Halmashauri kwa mujibu wa maelekezo ya Katibu Mkuu OR-TAMISEMI yaliyotolewa kwa barua yenye Kumb. Na. CFC.133/307/01/157 ya tarehe 12 Desemba, 2022. Mgawanyo wa madaraja ni kama ilivyooneshwa katika **Jedwali Na.4.2.**

Jedwali Na.4.2 : Mgawanyo wa Mapato ya Ndani kwa ajili ya Utekelezaji wa Miradi ya Maendeleo

N a	Daraja la Halmashauri	Kiwango cha Mapato yasiyolindwa	Asilimia ya Kuchangia kwenye miradi	Asilimia ya fedha za miradi - kuchangia mikopo ya Vikundi	Asilimia ya fedha za miradi - kuchangia TARURA	Asilimia ya kuchangia miradi mingine
1	Daraja la Kwanza	Bilioni 20 au zaidi	70	10	10	50
2	Daraja la Pili	Bilioni 5 au zaidi	60	10	10	40
3	Daraja la Tatu	Bilioni 2 hadi 5	40	10	-	30
4	Daraja la Nne	Chini ya Bilioni 2	20	10	-	10

Chanzo: OR - TAMISEMI

4.4.3 Maelekezo ya Kisekta katika Mamlaka za Serikali za Mitaa

- (i) Kutenga bajeti kwa ajili ya kuboresha mazingira ya kujifunzia na kufundishia katika Shule za Msingi na Sekondari kwa kuzingatia Sera ya Elimu na Mafunzo 2014, Toleo la 2023;
- (ii) Kuandaa na kuwasilisha takwimu OR-TAMISEMI kwa ajili ya kuwezesha utengaji wa bajeti ya Elimumsingi na Sekondari (Kidato cha V na VI) ifikapo tarehe 31 Desemba, 2024;
- (iii) Kutenga bajeti kwa ajili ya ununuzi wa dawa, vifaa, vifaa tiba na chanjo pamoja na kutenga shilingi 1,000 kwa kila mtoto mwenye umri wa chini ya miaka mitano ili kuimarisha huduma za lishe;
- (iv) Kutenga bajeti kwa ajili ya kujenga, kukamilisha na kukarabati miundombinu ya vituo vya kutolea huduma za jamii;
- (v) Kutenga bajeti ya uhamasishaji kwa wakulima, wafugaji na wavuvi kushiriki katika ujenzi na ukarabati wa miundombinu ya kilimo, mifugo na uvuvi kwa kushirikiana na sekta husika;
- (vi) Kuendelea kutenga bajeti za matengenezo na mafuta ya vyombo vya usafiri kwa Maafisa Ugani na Watendaji wa Kata ili kuwezesha ufuatiliaji wa shughuli za kilimo, mifugo na uvuvi pamoja na shughuli nyingine za Serikali katika Kata;
- (vii) Kuendelea kutenga bajeti kwa ajili ya kuhamasisha ushiriki wa sekta binafsi katika shughuli za kiuchumi;
- (viii) Kuendeleza mipango miji na kufanya matumizi bora ya ardhi katika vijiji, kuendeleza miji midogo inayochipukia pamoja na kurasimisha makazi yaliyojengwa kiholela;
- (ix) Kutenga bajeti kwa ajili ya kamati za ushauri wa kisheria na kamati ya maadili ya wilaya ya mahakama; na
- (x) Kutenga bajeti ya usimamizi na uendelezaji wa maliasili, malikale na mazingira.

4.5 Masuala Mengine Muhimu ya Kuzingatiwa Wakati wa Uandaaji wa Mpango na Bajeti

57. Pamoja na maelekezo ya ujumla na mahsus yaliyotolewa, masuala mengine muhimu yanayopaswa kuzingatiwa ni: Masuala ya muungano; ushirikiano wa kikanda na kimataifa; Ujenzi wa Mji wa Serikali na Taasisi za Umma Jijini Dodoma; Uchumi wa Buluu; Uchumi wa kidigitali; masuala ya watu wenye ulemavu; masuala ya kijinsia; mazingira; afua za lishe; VVU, UKIMWI, afya ya akili na magonjwa sugu yasiyoambukiza; mapambano dhidi ya rushwa; mapambano dhidi ya dawa za kulevya; uwekezaji wa ubia kati ya sekta ya umma na sekta binafsi; uwezeshaji wananchi kiuchumi; masuala ya haki jinai pamoja na masuala ya Anuai za Jamii katika Utumishi wa Umma.

4.5.1 Masuala ya Muungano

58. Maafisa Masuuli wa Wizara, Idara Zinazojitegemea, Wakala za Serikali, Taasisi na Mashirika ya Umma wanaelekezwa:

- (i) Kuhakikisha kuwa hoja za muungano zinaendelea kushughulikiwa; na
- (ii) Kuendelea kutenga bajeti kwa ajili ya kuwezesha shughuli za ushirikiano baina ya Serikali ya Jamhuri ya Muungano wa Tanzania na Serikali ya Mapinduzi ya Zanzibar.

4.5.2 Ushirikiano wa Kikanda na Kimataifa

59. Katika kuimarisha ushirikiano wa kikanda na kimataifa, Maafisa Masuuli wanaelekezwa:

- (i) Kuzingatia maelekezo ya Mwongozo wa Ushirikiano wa Maendeleo (*Development Cooperation Framework - DCF*) wa mwaka 2017/18 - 2024/25 pamoja na mpango kazi wake;
- (ii) Kuendelea kuzingatia itifaki, mikataba na makubaliano baina ya Tanzania na nchi nyingine na ile ya kikanda na kimataifa inayojumuisha Kamisheni ya Umoja wa Afrika, Jumuiya ya Maendeleo Kusini mwa Afrika, Jumuiya ya Afrika Mashariki na Mashirika ya Kimataifa;
- (iii) Kuwasilisha Wizara ya Fedha makadirio ya michango ya uanachama wa kikanda na kimataifa ndani ya wiki ya kwanza ya Desemba, 2024 kwa ajili ya kujumuishwa kwenye bajeti;
- (iv) Kuendelea kutumia kikamilifu fursa zilizopo katika makubaliano kati ya nchi na nchi, kikanda na kimataifa kwa manufaa ya Taifa kwa kuzingatia diplomasia ya uchumi; na
- (v) Kutenga bajeti ya kugharamia utekelezaji wa viashiria vilivyoainishwa na washirika wa maendeleo kama vigezo vya kuipatia nchi msaada wa kibajeti ili kuiwezesha nchi kukidhi vigezo vya kupata fedha.

4.5.3 Ujenzi wa Miundombinu na Ofisi za Wizara na Taasisi za Umma Katika Mji wa Serikali Jijini Dodoma

60. Maafisa Masuuli wanaelekezwa kuzingatia mahitaji ya kukamilisha ujenzi wa miundombinu na ofisi za Wizara na Taasisi katika Mji wa Serikali na Makao Makuu Dodoma. Hii ni pamoja na kuzingatia madai ya wakandarasi na washauri elekezi pamoja na gharama za samani ili kuhakikisha ujenzi wa awamu ya pili unakamilika kabla ya kuanza awamu nyingine.

4.5.4 Uchumi wa Buluu

61. Maafisa Masuuli wa sekta zinazoguswa na uchumi wa buluu wanaelekezwa kutekeleza Sera ya Taifa ya Uchumi wa Buluu ya mwaka 2024 ili kuibua na kutumia fursa zitokanazo na rasilimali za maji bahari na baridi kwa lengo la kukuza uchumi na kuchochea maendeleo ya Taifa.

4.5.5 Uchumi wa Kidigitali

62. Maafisa Masuuli wanaelekezwa kutekeleza Mkakati wa Taifa wa Uchumi wa Kidigitali 2024–2034 kwa kuzingatia yafuatayo:

- (i) Kutenga bajeti kwa ajili ya kujenga mfumo jumuishi wa kissekta na kuhakikisha mfumo huo unabadilishana taarifa na mifumo mingine;
- (ii) Kuhakikisha mifumo inayotoa huduma kwa wananchi inaunganishwa na mfumo wa utambuzi wa watu (Jamii Namba);
- (iii) Kuhakikisha vituo vya kutolea huduma kwa wananchi vinaunganishwa na mtandao wa intaneti ili kuboresha utoaji wa huduma; na
- (iv) Kutenga bajeti kwa ajili ya kuandaa miongozo ya matumizi ya TEHAMA kwa sekta.

4.5.6 Masuala ya Watu Wenye Ulemavu

63. Katika eneo hili Maafisa Masuuli wanaelekezwa kuendelea kuzingatia Sera ya Taifa ya Maendeleo na Huduma kwa Watu Wenye Ulemavu ya mwaka 2004 na Sheria ya Watu Wenye Ulemavu Na. 9 ya mwaka 2010 hususan kwa;

- (i) Kutenga bajeti kwa ajili ya ujenzi wa miundombinu wezeshi katika vituo vyote vya kutolea huduma kwa ajili ya watu wenye ulemavu;
- (ii) Kuzingatia maelekezo ya Mwongozo wa Utekelezaji, Ujumuishwaji na Uimarishaji wa Huduma kwa Watu Wenye Ulemavu Tanzania wa Mwaka 2022;
- (iii) Kutenga bajeti kwa ajili ya kutoa elimu kwa jamii kuhusu masuala ya watu wenye ulemavu
- (iv) Kutenga bajeti kwa ajili ya mahitaji ya watumishi wa umma wenye ulemavu kwa kuzingatia Mwongozo wa Huduma kwa Watumishi wa Umma Wenye Ulemavu wa Mwaka 2008.

4.5.7 Uandaaji wa Bajeti yenye Mlengo wa Kijinsia

64. Katika uandaaji wa bajeti yenye mlengo wa kijinsia (gender responsive budgeting), Maafisa Masuuli wanaelekezwa:

- (i) Kutambua masuala ya kijinsia katika maeneo yao kwa kufanya uchambuzi wa takwimu ili kutekeleza hatua za kukabiliana na upungufu uliobainika katika taasisi husika;
- (ii) Kutekeleza Mpangokazi wa Pili wa Taifa wa Kutokomeza Ukatili Dhidi ya Wanawake na Watoto (MTAKUWWA II 2024/25 – 2028/29);
- (iii) Kutenga bajeti kwa ajili ya kuboresha miundombinu inayozingatia jinsia; na
- (iv) Kutenga bajeti kwa ajili ya mafunzo kuhusu uandaaji wa mipango na bajeti yenye mlengo wa kijinsia.

4.5.8 Mazingira na Mabadiliko ya Tabianchi

65. Maafisa Masuuli wanaelekezwa kuzingatia mabadiliko ya tabianchi katika uandaaji na utekelezaji wa mipango na bajeti ikiwa ni pamoja na:

- (i) Kutekeleza Mkakati wa Taifa wa Matumizi ya Nishati Safi ya Kupikia (2024 – 2034) ili kupunguza uharibifu wa mazingira, changamoto za mabadiliko ya tabianchi na kupunguza vifo vinavyotokana na matumizi ya nishati isiyo safi (hatarishi);
- (ii) Kutoa elimu na kutekeleza Mwongozo wa Biashara ya Kaboni wa Mwaka 2022 ili kuiongezea mapato jamii na Serikali;
- (iii) Kuibua miradi ambayo inaweza kupata fedha kutoka kwenye mifuko ya kimataifa inayosaidia nchi zinazoendelea katika kuhimili na kukabiliana na athari za mabadiliko ya tabianchi na uhifadhi wa mazingira;
- (iv) Kuendelea kutekeleza Mpango Kabambe wa Taifa wa Hifadhi na Usimamizi wa Mazingira (2022 - 2032);
- (v) Kujumuisha masuala ya uhifadhi na usimamizi wa mazingira wakati wa maandalizi na utekelezaji wa mipango na bajeti ili kuongeza uwezo wa nchi kuzuia, kuhimili na kukabiliana na athari za mabadiliko ya tabianchi;
- (vi) Kutenga bajeti kwa ajili ya kukabiliana na athari za mabadiliko ya tabianchi ikiwa ni pamoja kujipanga na kutathmini majanga ya asili yanayoweza kutokea;
- (vii) Kufuatilia vyanzo vya mapato vinavyotokana na masuala ya mazingira na mabadiliko ya tabianchi na kuhakikisha fedha hizo zinaelekezwa kushughulika masuala ya mabadiliko ya tabianchi na shughuli za maendeleo;
- (viii) Kuhakikisha taarifa za mapato na matumizi ya fedha zinazotokana na mazingira na mabadiliko ya tabianchi zinajumuishwa kwenye taarifa za utekelezaji; na
- (ix) Kuhakikisha mpango wa maendeleo na bajeti ya Taifa inahusisha jitihada za kukabiliana na mabadiliko ya tabianchi kwa kufungamanisha na usawa wa kijinsia ipasavyo.

4.5.9 Afua za Lishe

66. Maafisa Masuuli wanaelekezwa kuzingatia utekelezaji wa Mpango wa Pili Jumuishi wa Taifa wa Utekelezaji wa Masuala ya Lishe (NMNAP – II) wa Mwaka 2021/22 – 2025/26 ili kukabiliana na changamoto ya lishe duni kwa kutekeleza yafuatayo:

- (i) Kutenga bajeti kwa ajili ya kutoa elimu kwa jamii juu ya matumizi sahihi ya chakula yanayoendana na lishe;
- (ii) Kutenga bajeti kwa ajili ya kuongeza upatikanaji wa huduma za lishe bora ngazi ya jamii na vituo vya kutolea huduma za jamii;
- (iii) Kutenga bajeti ya kuimarisha ushirikishaji wa sekta mbalimbali na sekta binafsi katika masuala ya lishe;
- (iv) Kuendelea kutenga bajeti kwa ajili ya afua za lishe kupitia *Objective Y*; na
- (v) Kuhakikisha fedha za lishe zinatumiwa kama zilivyokusudiwa.

4.5.10 VVU, UKIMWI na Magonjwa Sugu Yasiyoambukiza

67. Maafisa Masuuli wanaelekezwa:

- (i) Kuendelea kutekeleza matakwa ya Sheria ya Usimamizi na Udhibiti wa VVU na UKIMWI, Sura 431;
- (ii) Kutekeleza Sera ya Taifa ya Kudhibiti UKIMWI ya Mwaka 2001 na Mkakati wa Tano wa Taifa wa Kudhibiti UKIMWI Tanzania 2021/22 - 2025/26 (NMSF - V);
- (iii) Kutenga bajeti na kuzingatia maelekezo ya Mwongozo na Waraka Na. 2 wa Utumishi wa Umma wa Mwaka 2014 kuhusu kudhibiti VVU, UKIMWI na Magonjwa Sugu Yasiyoambukizwa Mahali pa Kazi katika Utumishi wa Umma; na
- (iv) Kutenga bajeti kwa ajili ya kutekeleza afua za kudhibiti magonjwa ya afya ya akili kwa watumishi wa umma.

4.5.11 Mapambano Dhidi ya Rushwa

68. Maafisa Masuuli wanaelekezwa kutenga bajeti kwa ajili ya afua za kupambana na rushwa na kuzingatia Mkakati wa Taifa Dhidi ya Rushwa Awamu ya Nne 2023/24-2029/30 kwa mujibu wa Waraka wa Mkuu wa Utumishi wa Umma Na. 1 wa Mwaka 2024

4.5.12 Mapambano Dhidi ya Dawa za kulevya

69. Maafisa Masuuli wanaelekezwa kuendelea kuzingatia Sera ya Taifa ya Kudhibiti na Kupambana na Dawa za Kulevya ya Mwaka 2024, Sheria ya Kudhibiti na Kupambana na Dawa za Kulevya, Sura 95 na maelekezo ya Mwongozo wa Utoaji Elimu Kuhusu Tatizo la Dawa za Kulevya Nchini wa Mwaka 2022.

4.5.13 Ubia Kati ya Sekta ya Umma na Sekta Binafsi

70. Maafisa Masuuli wanaelekezwa kuzingatia Sheria ya Ubia kati ya Sekta ya Umma na Sekta Binafsi, Sura 103, Sheria ya Bajeti, Sura 439, Mwongozo wa Usimamizi wa Uwekezaji wa Umma wa Mwaka 2022 na Waraka Na. 7 wa Hazina wa Mwaka 2021 kuhusu miradi inayotekelezwa kwa utaratibu wa PPP. Aidha, maafisa masuuli wanaelekezwa kuibua na kuanisha miradi inayoweza kutekelezwa na sekta binafsi.

4.5.14 Uwezeshaji Wananchi Kiuchumi

71. Maafisa Masuuli wanaelekezwa kuzingatia Sera ya Taifa ya Uwezeshaji Wananchi Kiuchumi ya Mwaka 2004, Mkakati wa Taifa wa Uwezeshaji Wananchi Kiuchumi wa Mwaka 2013 na mwongozo wake pamoja na kutenga bajeti kwa ajili ya kuweka mazingira wezeshi ya kiuchumi ili kuwezesha wananchi kutumia kikamilifu fursa zinazopatikana katika maeneo yao hususan sekta za kilimo, mifugo, uvuvi, nishati, madini, biashara, masoko, michezo na huduma za kifedha. Aidha, Maafisa Masuuli wanaelekezwa kuzingatia Kifungu cha 35 cha Sheria ya Ununuzi wa Umma, Sura 410 kuhusu upendeleo wa kipekee kwa makundi maalumu.

4.5.15 Masuala ya Haki Jinai

72. Maafisa Masuuli wanaohusika katika mnyororo wa Haki Jinai wanaelekezwa kutenga bajeti kwa ajili ya utekelezaji wa mapendekezo ya Tume ya Haki Jinai/Mkakati wa Haki Jinai kwa kuzingatia yafuatayo: -

- (i) Kuwajengea uwezo watumishi wa taasisi za Haki Jinai ili waweze kutekeleza majukumu yao kwa weledi na ufanisi;
- (ii) Kutoa elimu kwa umma kuhusu haki na wajibu wa mwananchi katika mnyororo mzima wa Haki Jinai kwa ajili ya ustawi wa utawala bora nchini;
- (iii) Kutoa mrejesho kwa umma kuhusu mafanikio yanayotokana na utekelezaji wa mapendekezo ya Tume ya Haki Jinai;
- (iv) Kuimarisha ushirikiano na sekta binafsi ili kuongeza kasi ya utekelezaji wa mapendekezo ya Tume ya Haki Jinai;
- (v) Kuratibu na kusimamia mchakato wa marekebisho ya sheria zinazotumika kwenye Haki Jinai ambazo utekelezaji wake unaleta changamoto kwenye baadhi ya maeneo;
- (vi) Kuratibu uanzishwaji wa Mfumo Jumuishi wa Haki Jinai utakaounganisha taasisi zote za Haki Jinai utakaosaidia katika kubadilishana taarifa za kiuhalifu na zinazohusiana na hizo;
- (vii) Kutekeleza programu za maboresho zilizoandaliwa kwa ajili ya kuboresha utendaji wa taasisi za Haki Jinai na mfumo wa utoaji haki nchini;
- (viii) Kuimarisha miundombinu ya upatikanaji wa huduma bora kwa watu wenye mahitaji maalum kwenye taasisi za Haki Jinai; na
- (ix) Kuimarisha mfumo wa uratibu na usimamizi wa utekelezaji wa mapendekezo ya Tume ya Haki Jinai.

4.6 Ufuatiliaji, Tathmini na Utoaji Taarifa za Utekelezaji wa Mpango na Bajeti

73. Maafisa Masuuli wanaelekezwa kuzingatia Mwongozo Jumuishi wa Ufuatiliaji na Tathmini wa Mwaka 2024 pamoja na masuala yafuatayo wakati wa ufuatiliaji, tathmini na utoaji taarifa za utekelezaji wa mpango na bajeti:

4.6.1 Ufuatiliaji na Tathmini

74. Ili kuboresha shughuli za ufuatiliaji na tathmini ya utekelezaji wa mpango na bajeti, Maafisa Masuuli wanaelekezwa:

- (i) Kutenga bajeti ya kuimarisha utendaji kazi wa vitengo vipya vya ufuatiliaji na tathmini na kuwajengea uwezo wataalam wa ufuatiliaji na tathmini pamoja na kurithisha maarifa kwa watumishi wapya;
- (ii) Kutenga bajeti kwa ajili ya kufanya tathmini ya utekelezaji wa sera, mipango mikakati pamoja na malengo ya taasisi ili kubaini mafanikio na changamoto zilizojitokeza wakati wa utekelezaji wa shughuli za taasisi kwa kuzingatia ukomo wa Dira ya Taifa ya Maendeleo ya mwaka 2025;
- (iii) Kuhakikisha Kamati ya Bajeti inapitia na kujadili taarifa za ufuatiliaji, tathmini na utekelezaji kila robo mwaka ili kuleta uwajibikaji;
- (iv) Kuendelea kuandaa mpango na bajeti wa taasisi unaoakisi malengo, shabaha na viashiria vya utekelezaji wa Mpango wa Maendeleo wa Taifa wa Miaka Mitano 2021/22 – 2025/26; na
- (v) Kuimarisha mifumo ya uandaaji na utunzaji wa takwimu za utekelezaji wa shughuli za taasisi.

4.6.2 Uandaaji na Uwasilishaji wa Taarifa za Utekelezaji wa Bajeti

75. Maafisa Masuuli wanapaswa kuandaa na kuwasilisha Wizara ya Fedha na Tume ya Mipango taarifa za utekelezaji za kila robo mwaka ndani ya siku 30 baada ya kukamilika kwa robo ya mwaka husika kwa mujibu wa Kifungu cha 55 cha Sheria ya Bajeti, Sura 439 na Kanuni zake. Aidha, Maafisa Masuuli wanatakiwa kuwasilisha taarifa za utekelezaji za mwaka Wizara ya Fedha na Tume ya Mipango kabla ya tarehe 15 Oktoba. Nakala za taarifa za utekelezaji za robo mwaka na mwaka mzima kutoka Ofisi za Wakuu wa Mkoa na Mamlaka za Serikali za Mitaa ziwasilishwe OR – TAMISEMI, Taasisi na Mashirika ya Umma ziwasilishwe Ofisi ya Msajili wa Hazina na nakala kwa Wizara mama.

4.7 Maelekezo kuhusu Maandalizi ya Uchaguzi Mkuu

76. Maafisa Masuuli wanaelekezwa kufanya maandalizi stahiki kwa ajili ya Uchaguzi Mkuu wa Rais, Wabunge na Madiwani wa mwaka 2025 kwa kuzingatia Sheria ya Uchaguzi wa Rais, Wabunge na Madiwani ya Mwaka 2024 pamoja na maelekezo mahsusi yatakayotolewa na Serikali.